

00250

黃巖田上洋毛氏譜卷三

藝文

六世孫宗澄謹纂

近世譜牒類有藝文一門分內外編以族內人作者為內編族外人代族內人作者為外編吾四世祖鳳池公有詩文數卷被火蕩然僅記其輓陳家姑祖母詩六句云嗚呼我姊命屯遭百劫千磨到暮年娘撫孤兒空抱恨孫依祖母更堪憐昔時鍼帶含愁渡此際銘旌拭淚懸灰燼之餘賸茲零什蓋不免甕焉傷之矣吾父子倫公偶有述作隨手拋棄近年力就衰不復有作欲存而無可存

宗澄

少時考課所餘束置高閣隨為回祿所災

厥後宦遊江右一行作吏此事遂廢間有篇牘貯存國變後復多散失今於故紙堆中拾取數首大都不足以存閱之滋愧惟吾譜既有藝文一門若竟空諸所有未免負負因姑留數篇益以友朋贈序隨時代先後爲之次不復分內外篇蓋贈序所存大都傳贊壽言所以表揚先德義當首列 宗澄 略有登錄姑附於後而不敢僭體例所不拘也

毛氏二賢母傳

王舟瑤 舉人廣東候補道

余每讀西銘輒惻然有感於中而不能自己一日友人毛宗澄敬銓述其兩世賢母遺事來乞文余深歎暗合西銘之旨益信橫渠之言不吾欺也遂不辭而爲之傳敬銓之言曰吾曾大母

金黃巖木坑畧人歸吾大父九成公時吾家貧甚破屋數椽不蔽風日曾大母畧不爲意嘗曰風掃地月當燈天然景趣也惜不時有耳家本製紙遺有竹稍曾大母取其細者編爲箒其麤則碎之浸以清泉暴以烈日熱火能然其光踰燭曰吾今可以補風月之缺矣所居曰黃巖溪地确不足畊民恃竹木爲生而距市遠每取其材編而爲篋順流而下當夫大水發時篋客滿溪赤足濡體纍纍皆是吾家居近谿濕則來假衣夜則來乞火率以爲常曾大母於所求靡不應有時不足卽解己衣衣之不以爲褻且必爲具食曰天寒被水不飽食行易致病客或辭必堅留之時家中食指漸餽饗殮已不繼家人頗有後言曾大母

曰願減吾食以給客食。明日卽不食。繇是家人不敢言。遇乞人有老者幼者必加意矜恤之。頭面癩癩者滌治之。衣服垢敝者澣濯之補綴之。人或以爲穢。則曰吾絕不聞也。其慈善率如是。敬銓又曰吾大母王同縣甯溪人也。性婉婉。事翁姑必誠必敬。自奉甚儉。而待人惟恐不及。扶危濟困。寔有吾曾大母風。凡飢餓者無不恤。歲時伏臘。遇有珍羞。必分饋鄰里。不以物寡而遂已。人亦不以其薄而少之。工役之老者。每食必另與蔬菜魚肉。曰我年老。渠亦年老。須善欸之。故舊人來必有贈遺。亦不計較多寡。曰是芟匕者聊以致吾意耳。壽八十三。與吾先大父鳳池公同年而卒。鄉之父老傳吾兩世事。至今猶津津不絕口。甚有

至泣下者。敬銓之言如此。余聞而歎曰。賢哉二母。其事雖細。而其心固仁人之心也。所謂民吾同胞物吾與也。所謂疲癯殘疾。惻獨鰥寡。皆吾兄弟之顛連而無告者也。是有合西銘之作也。夫二母生農家。伏處山谷。非有詩書之薰染。師氏之啟迪也。而其所爲非邀譽於鄰里。責報於子孫也。不過推其不忍人之心。而求吾心之所安而已。烏虜仁矣。彼世之身有牧民之責。或席豐履厚。以視顛連困苦而漠然無所動於心者何邪。

書毛母金氏事

天台張廷琛歲貢

光緒乙未重修郡志。余與黃巖毛君敬詮同事纂修。商榷古今。辯晰疑義。志甚相得也。丁酉敬詮拔萃以去。一夕敘述家世若

黃巖田山洋子氏家譜 卷三
深有感於曾大母之事。其言曰。宗澄高高祖世華府君。自邑城始遷西鄉黃巖溪。以力田起家。三世單傳。至曾祖賡唐府君。始稱小康。妣金氏相之以勤儉。而性尤仁愛。居旁有溪。爲黃巖溪一帶竹木所自出。方之游之者。日往來不絕。篔夫有失水而濕衣。裙投至吾家。妣必出衣易之。爲焙其濕衣。且留飯焉。如是以爲常。凡乞人老幼男女襁續而至。雨則笠之。寒則火之。見有少孤而疵癩者。則爲藥以醫治之。不以垢膩介嫌。蓋一片痾瘵之心。絕無人我之見。宗澄所聞於祖父母者如此。其他懃行。祖父母所未言。固未能詳也。子幸爲紀之。以垂家乘。俾後世子婦知所法焉。余聞其言甚質。故篤信其事不浮。竊謂祖先有善而不

揚非孝也。揚而不以寔亦非孝也。若敬詮者可謂知顯揚之道矣。且夫士大夫所最難化者。人我之見耳。立朝者植黨樹援。講學者分門別戶。皆此人我之見爲之祟也。始之起於一二鉅儒之私。卒之釀爲累代家國門牆之患。漢唐宋明之黨禍。昭昭可鑒。誠能泯人我之見。擴胞與之懷。將視他山之頑石毒藥。皆吾生平之攻錯而針砭者也。舉世之疲癯殘疾。皆吾兄弟之顛連而無告者也。尙何忍獨樂其樂。而獨利其利哉。敬詮貢入成均。將有民社之寄。異日出而治國。推其曾大母相家之道足矣。謹預書此以贈。并質之敬詮亦當以爲然也。

木算行 美黃巖溪毛家二賢母也

邱瞻恒

由優貢考
取小京官

天寒北風溪水漲。赤足濡體傍溪唱。夜昏溪暗行不得。假衣覓火誰相諒。毛家有母績未休。爲見尊客重有憂。吾家不足未至是。吾能給爾所取求。解衣乞客乞色喜。推食食客乞言酬。母惠不可忘。母德孰與侔。一般性命無彼此。尊客欲辭必堅留。更有老者幼者踵門言乞聲未畢。加意撫恤如同儔。頭癩面瘡爲滌爲治。衣垢服敝爲澣爲修。他人言穢母不羞。吾見世之人珍羞自御良田千疇。刻剝取利骨肉爲仇。不念困苦陌路悠悠。減食分餐世所鮮。至今尊客頌美萬千秋。又有婦賢能繼志。矜孤恤老歲分饋。扶危濟困有母風。見人饑餓涕盈泗。顛連無告天心哀。一視同仁聖賢事。安得人人皆師毛家二賢母。行菩薩行。心

菩提心。推己及人。不分他與自。風淳俗慤。眾生念佛消我見。同登極樂壽無既。母出於金婦系王。慈善相繼家熾昌。二水合抱溪流長。木算安行慶休祥。利物澤人福無疆。若子若孫世世守之無能忘。

鳳池公七秩壽言

厲以須 歲貢生

鳳池毛君余姑舅親也。居同里。生同庚。幼同學。交君者莫余爲久。知君者莫余爲深。君自少謹飭。侍大父母父母下。未嘗有疾言遽色。入塾後讀書能明大義。廉公有威。行輩中無不愛之重之。年二十餘。受督學李北溟侍郎知。撥入郡庠。創毛氏斯文之業。時大父母父母俱無恙也。尊闔王夫人能承舅姑歡。孝養無

黃履日一海子日家詩 卷三
缺。二子尚幼。亦能誦詩讀書。恂也唯謹。一門全福。已嘖嘖人口矣。惟君家非素封。課徒辛勤。不遑自課。以故南闈一試。不復奮飛。余雖食餼。終以明經老。視君之肯堂肯構。寢熾寢昌。其相去爲何如也。歲癸酉。余假館君家。君之諸孫俱幼。惟鶴送小送頭角崢嶸。文思敏捷。余嘗指以告君曰。此君家千里駒也。不五年果同日采芹。聲名藉甚。遠近之人爭欣羨之。卽今之名宗紀宗澄者。是其他日學益進業益精。所至又烏可量哉。余後以徙居他處。與君睽違。不克時尋舊好。以繼洛社香山之會。心竊傷之。忽客有叩扉請者。余啓而納之。則君之哲嗣子倫也。與之坐而問曰。胡爲乎來哉。曰。爲父母懸弧之辰。敢乞一言以爲壽。余曰。

爾父母壽幾何歟。曰。八十矣。余笑曰。嘻。余本同庚。微爾言。余亦不知老之將至也。猶康強乎。曰。猶善飯。不待杖而行。琴書一榻。日以自娛。其精神矍鑠。比二十許少年也。余曰。是殆羲皇以上之人。非塵世所克有也。又詰之曰。爾知爾父母之所以得壽歟。曰。余不敏。烏足以知之。曰。然。爾父母忠厚傳家。溫恭處世。修德以致壽也。然諾不輕。施爲必謹。礪行以培壽也。衣食不求美。持家知自足。清心寡欲。以保壽也。至於八旬偕老。四代同堂。兩昆濟美。尤天假以娛壽者也。余知爾父母有年矣。敢述其顛末。以爲爾父母侑觴。爾先歸。余將繪家慶圖。以至。

贈毛子倫先生敘

王舟瑤

天下之風俗奚自乎。自一身而一家而一鄉而天下。漸推漸積而成也。家之中其父兄言行不苟。立身有本末。則子弟必有所敬畏而不敢爲非。鄉之中有二三老成者以爲表率。則少年之秀者有所勸而成。其不肖者有所憚而不敢肆。由是推之一國。則成一國之風俗。推之天下則成天下之風俗。其起甚微其係甚大。非特公卿大夫處民上者有其權也。卽士君子之居家居鄉者莫不有其責焉。余友毛宗澄敬誼。幼學能文。其心常歉然不自足。與人交氣和而言慎。惟恐有傷於人。余心異之。今歲同客閩中。昕夕聚處。間嘗道及家世。言其大父茂才君治家最嚴。其父子倫先生事之唯謹。家人稍不如意。茂才君輒斥責不貸。

既又閉戶蒙頭睡。飲食不進。先生必長跪戶外請罪。俟其怒釋而後起。有一弟甚友愛。家雖不豐。而延師教子無少吝。有義舉事無不爲。鄉里有爭。忍無不來質正。先生口雖訥。然得一言無不釋然以去。有所饋謝無不拒。余聞其言。始知敬誼之教有自來。而歎先生之有益於鄉者甚大也。若使處處具得如先生者。數人以教其子弟。以化其鄉人。而天下風俗有不醇者。吾未之信也。先生居黃巖之西八十里。其地名黃巖谿。巖壑奇麗。雲樹蒼莽。水聲瀾七。終日聞琴筑聲。引流激湍。置爲雲碓。取竹碎而爲紙。可以治生。戶外有田疇可耕。子五人。其四人皆能讀書。其一人能治田。先生偕其配王。年俱七十。強健善飯。暇而出游。則

鄉之父老兒童相迎間笑語歸則幼子童孫懽然繞膝此又極
人世天倫之樂以視世之役役於當貴者不值一歌也敬詮歲
暮將歸省求余一言以爲先生壽辭不獲已故書此俾歸而求
之於家益修其身而厲其學它日出而治民卽以得於家者而
施之天下可也壬辰九月

誥封朝議大夫子倫毛先生八秩壽言

江毓昌

舉人官至四川臬臺

辛丑歲余再守南昌延黃巖毛君敬詮來襄治理沉澆氣合香
火緣深心甚契之次年敬詮以明經服官江右余亦分巡贛南
題別駕之輿仲舉因而就辟入參軍之幕鮑昭由此見才時則
邊徼戎興潢池兵弄論涖頭而草檄我媿陽明守楹訓以決囚

君真定國嘗以軍書暇豫訪厥家傳賔宴清閑縱談世德藉悉
封翁子倫先生敦穆行迓天庥純固葆真優游沐道有爲人不
可及者余蓋健慕不置者久矣客秋敬泉令臨汝先生因迎養
衙齋俸入魚祖展寸草春暉之戀扶來鳩杖喜大椿歲月之賒
叶符瑞之圖徵正值香凝菊殘厥華筵而祝嘏爭看綵舞萊衣
敦志歡承引年典重屬余爲序又何敢辭然思胼胝強加多據
曼齡之頌何如傳揚徵實證明得壽之符謹就所聞書以當祝
先生初騰偉步卽振奇懷學詩禮而趨庭共游楊以立雪其尊
人鳳池先生上庠名宿後學經師鼓欲攻徒杖先撻子領有方
無方之教木舌藉宣得亦親亦友之宜金針巧度洵足樂也夫

何間然。惟是千粟無靈。一燈長對。翻寒家之故簞。只此青瓊。懸明鏡於高堂。已憐白髮。乃謀伯仲。合究工虞。仿遺製于蔡侯。分餘甘于薛氏。經營數載。彷彿小康。曾暫之羊棗。以供橫渠之臯比。可撤。此其不可及者一也。維時蘭階慶溢。瓜瓞祥綿。魏世翼丁。既韓棣華之鄂。竇家五子。更飄桂樹之芬。舊德能承。家聲益振。顧以九髻十數輩。咸使執經。食指卅餘人。依然同爨。一身措拄。備極勤敏。百種騰挪。頗形支絀。仍復緯蕭自恃。錙銖不妄。分毫糠覈能餐。滄瀨必求豐潔。此其不可及者二也。若夫義重嵩衡。財輕篋籜。三喪未舉。麥舟可捐。九折難驅。筴橋必駕。脩將墟之邱墓。解好鬪之鄉鄰。范叔升誠寒。贈緜袍而不惜。周郎需餉。指

困粟以何難。其施之事。為者皆陰功之積券。其植諸方寸者。悉續命之良田。具胞與懷。無你我相。菩提之樹已種。功德之花遍開。此其不可及者三也。是知因果相尋。豆瓜各應。黃墟錫祉。由篤厚以培之也。赤芾增輝。在仁慈以啓之也。而先生乃渾自澹忘。仍安儒素。即君官貴。卻行馬而不施。祭酒鄉推。謝安輿而不御。一道芒鞋之迹。健步如仙。三更梵貝之聲。冥神禮佛。從吾所好。與世無求。此其不可及者四也。然或值耄耆之年。營菟裘之築。謝絕人世。枯寂雲關。又非先生之所願也。故當板輿就養。竹杖登程。航大海以觀湖。過靈山而數佛。北滬繁華之地。評隲綦詳。南朝金粉之區。遨遊殆遍。直至水窮彭蠡。山望匡廬。尋孺子

黃巖日上海華邑家譜卷三
之亭。東湖月上。登滕王之閣。南浦雲飛。人訝神仙。到處齊呼八百。翁真矍鑠。行滕已過三千。此其不可及者五也。乃者入河陽之境。遍是桃花。觀靈谷之山。滿垂棠蔭。筍輿停處。草野肅然。則福時不必譽兒。宋登已稱神父。掀髯一笑。喜可知已。及解行橐于琴堂。仍理隨車之書笥。一編默坐。如對聖賢。五種遺規。于斯寢饋。聞鞭笞而必志。誠判決之宜寬。謂長吏一念之慈。即能造命。彼小民幾微之累。便足傾家。以庭訓作官箴。本義方爲治譜。片言提命。萬姓蒙庥。此其不可及者六也。茲則運際昌期。鳳詔煥申生之綵。寵承嘉獎。鸞綸褒子舍之榮。啓勝會于無遮。國恩紀盛。祝還年之大董。家慶成圖。喜集寅恭。頌添亥算。印床疊笏。

烏衣且列嬰行。冠帶環庭。紫氣定浮百里。飛一星而見丙。花開頃刻之蓮。當九月之良辰。果進長生之荔。昌燕臺羈跡。兕酌難親。毛舉卮言。無當風搖音樂。心香遙蕪。定知兩散曼陀。卜他年三樂傳觴。爲食道圓成之證。佩今日一枝橫笛。譜披離匹溢之詞。

黃巖毛子倫先生八十壽言

馮

冕

紹興興貢生現任新嘉坡領事

往古養善壽命之士。稟天獨厚。與物爲春。無矯異獨絕之行。而有澹樸順化之德。自其誕降。以臻高年。素位而行。靡所不樂。乃至匿影山林。未以爲悶。宅身憂患。亦不爲累。消搖人間。悠悠焉穆穆焉。誠有得於莊周繕性之道。而非嵇康養生之說所能盡。

也。以冕所聞則有世丈黃巖毛子倫先生。幼承家學。被服儒術。資忠履信。舍華去辯。耳目弗營。恆以古道相許。風雨如晦。既見君子而瘳。用能虛受百益。戰勝萬籟。明自然以爲宗。無誘慕於世僞。根本既立。聲聞斯懋。門內父子昆弟之言。門外鄉鄰朋友之誼。皆於先生無得間焉。壯歲以往。人事多艱。先生數學之餘。稍治生產。鄰有以楮爲業者。輒與季謀。將劾手足之烈。以資伏臘之費。匪農匪圃。亦工亦商。蓋端木貨殖。原無害於性道文章。而南陔采蘭。重有託於仁人孝子。馨爾夕膳。薦爾晨餐。伊可懷也。尤可式也。且夫人間至樂。惟有天倫。其次不朽。孰與太上。今之健者。驅策王塗。方行政海。當其得志。亦足自熹。然而爲物所

役。莫遂其初。唯則析人之珪。擔人之爵。出平原而聯騎。居高閔而崇鼎。其心則馳。其道以溷。於時繁會無常。浮雲頃變。昨爲榮華。今爲憔悴。當世所見。往往而有。亦既乘時飛騰。自拔塵埃。羊角扶搖。莫肯反顧。其意氣可謂盛矣。而亦何益於我哉。先生哲嗣敬詮大令。恂也儒者。經明行修。援學古入官之義。作奉檄養親之計。乃者筮仕江右。下車臨川。人文所鍾。民俗醇美。其地去越亦非縣絕。大令請於先生。迎致之任所。子賤鳴琴而治。伯魚趨庭惟謹。天靜風和。松茂柏說。先生顧而樂之。今秋九月爲先生八十覽揆之辰。大令書來東京。屬冕一言爲壽。冕於敬詮夙隸心交。又爲先生辱爲後進。苟有積素。宜舉以獻。所懼文質無

底身名不立。三寸弱翰。有慚奚斯頌魯之詞。萬里扶桑。未明徐市求仙之術。欽念芳問。翹慕洪算。惟述孝友。不涉瑰異。冕之迂陋。當為時賢所不許。或為先生所樂聞與。則願敬詮為冕奉觴以進。且為祝曰。東海不竭。南山不騫。人惟壽者。克全其天。德劭神王。於休綿綿。

毛子倫先生八十晉一壽序

黃象熙江西臨川縣舉人揀選知縣

戊申七月。邑侯何伯駿明府。以書招熙襄辦統計事。時彭少溟觀察及李君翮其朱君子祁等方與熙組織地方自治會研究所。擬就簡章稟縣申詳上憲。八月蒙憲批示立案。適何侯期滿卸事。黃巖毛敬泉使君為之繼。熙初進謁。其言呐々若不能出

諸口。貌温々若無所能。意其德勝于才。治事或有不逮。九月初十自治會研究所開會。使君蒞會。殷敗詢地方興革事宜。期於實力從事。而於煙賭之查禁。學堂之改良尤為加意。自是屢與熙商辦地方事。皆毅然施行。不稍瞻徇。始歎使君之才即在德中。其聽訟也。意存矜恤。不輕用刑。惟犯煙賭者則重責不貸。一日查獲違禁賣烟之某甲。僅施薄懲。心竊訝之。次日以他事進詢及其故。使君曰。家君年八十。迎養在署。聞鞭撲必致責。昨方受責故耳。熙肅然起敬。因備詢生平。使君乃出翁行略。且曰。明年家君八十。晉一。將設宴于署。博老人歡。盍贈一言以侑觴。熙受而展讀。乃知使君之賢。雖得諸義方之訓。殆亦天之所以佑

翁而將以昌大其後也。翁字子倫。賦性純謹。父鳳池公授徒自給。翁幼隨父讀。孜孜不怠。年二十。鳳池公命之曰。吾家食指多。而用不給。吾館於外。若授徒於家。就便經理家事。翁承命課讀之餘。并課耕織。時翁弟公憲先生方從學。翁曰。爲人子而不能致仰事之資。顧使老親有俯畜之累乎。吾觀吾鄉業紙者。頗獲利。弟能學成造紙。將與弟專其責。倘得贏餘。以養親。卽不士而工而商。亦何不可。弟從之。數年後。果獲贏利。鳳池公不復就館。翁兄弟且援例貢成均。旣而子弟漸長。就傅者多。家計又窘。鳳池公遂命翁兄弟析爨。各得薄田數畝。用仍不足。然堂上甘旨必不稍缺。又性好義舉。橋路有應脩。及有棺骸暴露者。皆竭力

從事。鄉之貧苦。量力周恤。排難解紓。務得其平。甚或出貲爲人息事。以故終歲勤勞。卒無餘蓄。其後鳳池公夫婦先後棄養。德配王恭人。又相繼逝。皆典質以營喪葬。家計之窘。較前尤甚。然翁未常以貧自戚。常謂諸子曰。爾輩但能力學。吾俯仰無愧。雖貧何害。年七十餘。使君始以明經官江西。翁不欲就養。惟居家以簡編自娛。常手抄先哲格言。隨時諷誦。暇時則賦詩見志。使君歷任永新瑞金。皆有詩章寄示。大旨以學道愛人致勗。後隨江訥吾觀察查辦贛屬會匪。而南康又以開教釀成巨案。使君奉命委任南康事。翁深慮刑辟或不慎。疊以手書切誠。以故南康教案保全甚大。雖上憲屢催嚴辦。卒從容慎理。不肯妄刑一

人舊秋調任臨川。翁聞是邑民純無刑戮事。欣然就養。其在署也。一如在家。日披閱手抄諸格言及五種遺規等書以自娛。或援引一二以教誡孫子。翁有丈夫子五。使君其次也。長三入庠序。四援入大學。五從南洋法政學堂畢業。諸孫子十餘人。年長者遊學外洋。孫又抱子。四代一堂。踰七濟七。皆能守翁之教。不稍踰。使君更有古儒吏風。今年年終甄別。大吏以使君治行稱最上聞。奉旨嘉獎。國恩家慶。萃於一門。無非翁盛德所致。其康健逢吉。後福正未有艾。固無待^熙之祝也。^熙不文不足以壽翁。惟承使君愛。又敬翁爲人。既謹序其生平。不得不更進一言爲舉觴之助。古人稱南山而道松柏。^熙則請以晉一之年爲翁之

初算。而謂後此無窮之算。將自此始可乎。

誥授朝議大夫子倫毛太夫子八旬榮壽序俞樹棠

進士官京都大理院推事

去吾家四十餘里。吾師敬詮夫子之居在焉。地爲黃巖溪。家居相近。又以受業有年。故家世甚悉。乙酉丙戌敬詮師嘗講學柔川。暇輒與羣從言曰。余家以教讀世其業。立教之嚴以吾祖鳳池公爲最。吾父性純篤。幼侍鳳池公讀。從者有過。撲吾父示警。吾父長跪認過。卒得歡心。年弱冠鳳池公以食用繁。命吾父爲童子師館於家。七藉以理。地故多竹。里人半業造紙。願不盡如法。價漸落。吾父與叔父謀曰。大人年近衰。猶就館。皆爲子孫累耳。弟曷專造紙業。苟獲利。庶息大人肩。吾與子卽不士而商而

工猶安也。叔遂專致於造紙。精良冠里。鄙價以倍。數年家漸裕。鳳池公不復館於外。吾父吾叔援例貢成均。余昆弟輩亦得少者。延師長出就傅矣。吾父又好成善舉。凡道路崎嶇。橋梁圯廢。必修理而後已。棺骸裸露。卽出資瘞埋之。貧苦告貸。探囊無少。靳親族州閭。皆服其誠信。遠近紛難就質者益眾。而家亦益窘。然甘旨之奉。未或缺也。吾祖父母年皆踰八十。已而相繼逝。吾父哀毀成禮。喪祭不敢嗇。家益不支。余之來館於茲者。以此師言若此。棠識之不敢忘。今年春爲太夫子八旬正壽之期。棠欲以一言爲壽。蓋去從學時已數十年矣。而太夫子樂善之心。老而彌摯。前歲吾師宰南康。去歲調臨川。今調浮梁。皆迎養在

署。猶日錄先正嘉言。懃行以自娛。時以學道愛人。勗吾師。用俾吾師治江右。所至民愛。所去民思。今上特旨嘉獎。以視曩時澤及鄉里者。不更溥乎。孔子曰。仁者壽。而後知太夫子年壽之永。自有道也。棠乃略述平昔所聞記憶不忘者。以娛太夫子。其亦爲晉一觴乎。

家嚴九旬壽慶徵詩文啓

家嚴字子倫。賦性純謹。幼隨先大父學。先大父授徒所至。家嚴皆身侍。能得歡心。先大父爲教嚴。徒輩有過。每撻家嚴示警。家嚴爲同學受過。處之泰然。年二十。先大父以授徒在外。不能顧家。食指日繁。資用不給。特命家嚴就家設館。兼理家事。由是家

嚴不復他出。吾家自家嚴以上。數世皆居黃巖溪。在黃巖縣西。其地兩山夾水。四時潺湲不絕。其山多竹。居民有以竹造紙。獲利倍常者。家嚴與叔父邦輔公謀曰。吾父頻年適館。皆以家累故。精力亦日就衰。弟如學造紙業。能獲贏利。俾吾父在家安食。則我與弟心亦稍安矣。叔父以為然。遂改業造紙。家計畧裕。先大父乃不復出授徒。先大父家法嚴。稍不如意。即閉門引被臥。輟飲食不進。家嚴率子弟輩長跪請罪。始乃釋然。以故先大父所在。家人無敢苟訾苟笑者。家嚴好善舉。凡道路橋梁及荒邱棺木毀壞者。必力圖補救之法。并為人排難解紛。勞怨不辭。有貧苦無藉來謀借貸。亦必盡周急之義。時澄昆季及從弟十餘

輩相率就學。需用浩繁。先母中年後有痰疾。葯餌復有所需。澄與兄紀才置身庠序。館穀所入。挹注無多。晚歲家用愈窘。債臺之積愈高。承先大父命。乃與叔父分爨。老屋數椽。薄田數畝。幾無以自存。惟先大父母甘旨之奉。無敢稍缺。光緒壬辰正月三日。先大父聚家人詔之曰。今歲我二老皆將棄世。爾輩家貧。恐難立辦。特先告知。家嚴聞之。駭甚。哀戚之容。達於面目。淚涔匕下。起居出入。跬步不敢離。是年七月。先大母棄世。十二月。先大父又患腹疾。家嚴侍奉惟謹。廁牕必親滌。未幾。先大父捐館。家嚴哀毀逾恒。祭葬盡禮。服闋。訓澄等曰。爾先大父母勤劬一世。我與爾叔父無所成立。惟望爾等學成名遂。聊報萬一。今爾先

大父母棄養。迫不及待。罔極之恩。將何時報耶。爲黯然神傷者久之。庚子十二月。先母見背。澄等痛慈闈之溘逝。又迫於家計。不能不餬口四方。時家嚴已越古稀。以家務攬心。援曰。傳之義。乃命澄。昆季輩分析。藉得息肩。閱三載。甲辰。澄以拔貢就職。指分江西。冀分升斗之養。家嚴不願遠出。日惟抄錄善書賦詩見志。每逾月。必有詩章見示。并勸七焉。以學道愛人爲勗。慈惠之誠。溢於言表。後澄權知永新。隨又委署瑞金。未抵任。贛南道江公毓昌調辦贛州各屬會匪。旋又委署南康。其時南康教案驟不可爬梳。家嚴聞之。深恐刑一不慎。恩威兩失。時以手書誥誡。屢請就養。皆不許。迨調任臨川。家嚴聞是邑民情純善。無事刑

辟。乃始歡然就道。到署以後。惟閱正誼堂全書。分類摘抄。不問外事。聞鞭朴聲。則怒然不安。曰。古人以德化民。當不若此。觀此。可以知家嚴之用心矣。明年澄又調署浮梁。有景德鎮者。吾國製磁之大工場也。磁工二十餘萬。皆來自他屬。無家室妻子。時或麇聚滋事。家嚴以居官擾不若居家安。未終任。卽欲歸。每謂澄等曰。吾家自城徙鄉。至爾輩已歷七世。宗祠譜牒。兩無所屬。吾心歉然。宗祠之建。吾自任之。譜牒則於汝等是賴。暇時輒與澄等議建祠修譜之事。澄卸浮梁任。家嚴遂買棹回里。未幾遭國變。澄亦從彭澤解組歸。迄今八年。宗祠告成。家譜亦將付梓。而家嚴則年已九十矣。今歲九月六日。爲家嚴攬揆之辰。家兄

黃巖日上海毛氏家譜 卷三
紀率暨及弟亨弟浩弟謙并孫輩十四人。曾孫輩七人。環請家嚴。謀爲家人介壽之禮。謹詮次崖略。幸

大雅君子寵以鴻文詩誥。爲侑觴之助。則受賜爲靡涯矣。謹啓

毛老伯子倫先生九旬大慶序

王運璣

舉人四
川知縣

古之時上敦於禮教。而下厚於風俗。凡耆老之賢者。朝廷有救老之典。以優崇之。非僅以爲一人一家之私慶也。卽家人子婦亦日致其孝養之忱。事生之禮。誠敬無缺。不必曰耆曰耄之年。而後徵朋置酒張樂廣延。作爲詩文以藻飾之也。自世之衰。而禮之薄。養老之典。旣廢。而孝養之忱。亦漸不如古。若貴若富。與積有名譽及家道稍豐者。六十以上。每於逢十之年。始行祝嘏

之禮。而諛美之壽文。於是乎起。三百年來。作者恆以此爲累。曾滌笙所不滿於歸熙甫者。此也。雖然。顧亭林生平不輕爲人作文。而潘次耕之壽文。未嘗却也。湯潛菴生辰不受屬員壽禮。而汪鈍翁之撰文。則必錄也。卽滌笙之誚歸熙甫者。亦不免自蹈之。是非壽文不可作。在作者受者爲何如人耳。余愧乏次耕鈍翁之名位。生平師友。又無學問人品。如亭林潛菴者。可藉以發抒其意見。復不能謝絕塵累。輟筆不爲酬應之文。故有所作。輒諷多諛少。今春爲吾宗煦亭太翁紫珊先生壽文。頗有世道人心之感。其中不無激詞。以示吾友毛君敬詮。余知敬詮亦以爲激也。旣而敬詮以其太翁子倫先生九十行畧示余。并屬余爲

黃巖曰：上海毛氏家譜 卷三
文以壽之。且曰：子於煦亭之乞言。胸中之蘊蓄與時勢相感發。誠有慨乎其言之。今又何以益我。余遲之無以應也。於是每遇敬詮卽以壽言爲請。余乃執筆而告於敬詮曰：君知君家舅季子孫之盛。則知太翁之所積者厚也。太翁自幼及老對於父母對於兄弟對於親戚鄉黨無非孝友睦婣任恤之事。周官之所謂六行者而一身備之。此與紫珊先生之存心行事無以異也。所異者紫珊先生習爲智者之動。日涉山巔水涯與樵夫牧豎相問答。溷跡市廛。不嫌塵襪。遠近婦孺皆識之。而子倫先生則習爲仁者之靜。遯跡邱園。教子孫耕讀而外。惟以書史自娛。至老

不倦。市人罕識其面。余家固與先生近。亦數十年未得一親杖履也。二先生者皆居黃巖溪。其伉爽沈靜之度。寔得山水之氣爲多。而子倫先生尤與古儒者相近。當敬詮之以明經分發江西也。歷宰永新、瑞金、南康、臨川、浮梁、彭澤諸縣。太翁初未就教。每寓書必兢匕焉。以學道愛人爲最。慈惠之誠溢於言表。又以南康教案糾紛。訖不易解。時手書誥誡。仍不肯就養。迨調任臨川。太翁聞是邑民情淳樸無事刑辟。乃許就養。到署以後。不問外事。惟闕張儀封所訂正誼堂全書。分類摘抄。聞鞭朴聲則怒然不安。曰：古人以德化民。當不若是。敬詮解浮梁任。太翁買棹歸里。終以官居擾不若家居安也。蓋太翁於宋明以來儒者之

書既多領會。故所以教其子及發爲愾歎者皆粹然儒者之言。雖隱德不曜。未能如潛菴之本理學宗傳以敷爲政治。與亭林之富有著述作爲天下郡國利病書。垂諸久遠。爲後世法。而敬詮舅季五人得奉之以爲歸。大半身列膠庠。敬詮且以仕顯。迄今數十年無有缺陷。而繞鄰之孫曾數逾二十。長者頭角嶄露。卽未毀齒之兒童。客至亦恂匕有禮。其後殆未可量。則信乎太翁之所積者厚也。今太翁之壽遠過亭林潛菴。惜余之文非次耕鈍翁。不足爲太翁重。未知太翁亦以詞之近古而錄之否也。

黃巖毛子倫先生九旬壽言

江杜原名忠業

青龍在屠維協洽之歲日在房之月爲我毛子倫先生九旬覽

揆之辰都人士將爲先生祝嘏之辭敬舉一觴而以其辭屬之。余匕粵稽古先哲人修於身教於家推於物者其以敬爲始基乎。詩小宛之次章曰各敬爾儀。天命不又。蓋言天人之際感應至速能自勝則能勝物也。故其首章曰明發不寐有懷二人以言乎子道也。其三章曰教誨爾子式穀似之以言乎父道也。其四章曰題彼脊令載飛載鳴以言乎弟道也。其五章曰哀我填寡宜岸宜獄士君子一日苟可自給卽有推已及物之心不以自私自利爲事也。而其卒章曰戰匕兢匕如履薄冰又反覆丁寧於敬之不可須臾離也大哉詩乎人道之隆其由是極乎。輓近習俗頹怠天與人日遠遂不能自勝於一身故處於家則父

子兄弟若水火參商之不相合推於物則示詐任詭無憚怛之
愛無忠利之教人道幾乎絕矣當斯張皇凌夸之交幸賴一二
魁艾耆碩發抒正論磨勵貞節砥柱波流之中鍛鍊老壽以轉
輪運會消息盈虛而後生小子受其嘯喻靡然景從成爲風氣
然後各相維繫於倫紀而不墜夫豈隅值而已哉惟我先生繼
尊人鳳池先生設塾授徒誠孝之懷數十年如一日及終極之
際又能哀毀盡禮其子道得矣待其弟邦輔先生盡手足之愛
因天然之利使習紙業俾能樹立其兄道得矣教子方嚴有法
度故梅友敬詮叔鼎剛甫季謙諸世兄均蔚然成令器而敬詮
兄作宰江右尤能與民漸摩仁義無弛不張寔本諸過庭之訓

其父道得矣樂善好施出於天性卽此推已及物介爾之心擴
充而光大之者於乎其殆有合於小宛詩人之志哉今先生年
屆耄耆雙瞳炯睟精潤之色浸滿大澤足爲當世儀表寔有保
嗇長年之道然則至今以往吾先生受天之祐逾期頤而上與
彭老比肩亦不待燭照數計而可券其必然者乎值此躋堂上
壽不敢以世俗濫辭進特引小宛詩人之義以表同人微意且
質之梅友敬詮叔鼎剛甫季謙諸世兄使世世守我先生之教
無厭斃焉

毛太封毛翁子倫老伯九表大慶敘

許元穎

丙午優貢
候選通判

福澤者天所以待有德非可以詐力爭焉者也故篤於孝友者

其身恆康疆而壽者。其子孫恆明達而繁昌。此何耶。和順積於中。斯血氣循其軌。五藏百骸皆充然。得其所養。由是期頤耄耆。坐享大年。身教言教之所垂。積久愈深。有以漸漬其家人婦子之心。使之相觀以化。學則樂羣而敬業。仕則勤政而愛民。其家遂方興而未有艾。如我子倫。毛老伯者。可以風矣。子倫老伯。余友。敬誼大令之尊人也。世居邑西鄉黃巖溪。其門閥之盛。子姓之繁。賢達明淑之人之多。與五部鄭氏。上鄧陳氏鼎峙。而年登大耋。神明不衰。尤爲邑中薦紳先生最。老伯又期答天貺。老而益勵爲善。凡夷道路。治橋梁。掩骼解紛糾。瞻族里之困乏。攘臂而起。意興如其少壯時。暇則手錄古人嘉言懿行。以自怡悅。

而示子孫。其尤所注意。則在營家廟。修宗譜。以敬宗而收族。論者謂其載福之基。胥本於此。而不知自求多福者。其大原因在篤孝也。大令嘗爲余言。老伯之事親。居則致其敬。養則致其樂。病則致其憂。喪則致其哀。祭則致其嚴。雖古純孝。無以過。孟子曰。大孝終身事父母。又曰。五十而慕。吾于大舜見之矣。言孝思不匱之難也。當太伯父母棄養時。老伯已年逾六十。躬親湯藥。手滌廁。踰殯葬。以後猶以親恩未報。爲戚儻。所謂終身事父母。五十而慕者。非耶。雖不至舜舜之徒也。則推以及人。恐其傾覆以傷遺體也。自必夷道路。治橋梁。恐其好勇鬥狠。不顧父母之養也。自必解紛糾。恐狐狸之食蠅蚋之姑嘬。以傷孝子心也。自

黃巖田上洋毛日家譜 卷三
必掩齒髀念其人與吾親同其高曾祖禰其祖父與吾祖父同其里閭也自必瞻族里營家廟修宗譜詩曰永錫爾類此之謂也故孝弟之至則善無不備可以福一世而有餘不孝不弟之至則惡無不備可以禍天下而無不足孝弟之道至今日而凌夷衰微極矣親病而禁學徒之歸省親歿而聽官吏之奪情學校所以教與朝廷所以治舉不知孝弟爲何事而家庭革命之說又有以扇其恣睢患氣旣盈禍遂中于一國魯論曰其爲人也孝弟而好犯上者鮮矣不好犯上而好作亂者未之有也今士卒可以逐將帥武人可以制朝權植黨擁兵互相攻伐妄希非分之福欲以力征經營卒之數年之間殞其身而墜其宗者

指不能一二屈也其犯上作亂之原皆不孝不弟階之厲倘有主持風教者下令郡縣求齒德俱尊如老伯者隆其禮敬厚其廩餼飭長吏就家乞言以爲國人式則敦薄俗而絕亂源或可挽回世變而乃無人過問令孝弟之澤不出里閭則誠世道憂也然吾聞大令服官江右時老伯恆手書勗以字民之道及就養臨川聞鞭朴聲怒然曰古人以德化民當不若是大令稟承庭訓遂以辦理南康教案爲民請命號稱循吏則仁言利溥書君陳所謂惟孝友于兄弟施于有政者豈虛語哉今歲九月大令偕其伯子梅友茂才及諸昆季將于九秩懸弧之辰率孫曾躋堂介祝屬穎一言以侑罍竊維孝事父母本非藉以邀福乃

發于天性之不能自己而大雅卷阿一章乃於彌性者一則曰似先公晉矣再則曰弗祿爾康矣三則曰純嘏爾常矣福壽蒸蒸不祈自至而不孝不弟窮詐力以爭百福者不旋踵間即受人禍冥誅以死則欲壽命久長流慶來葉舍孝弟末由矣類悲政教之窳風俗之壞而禍亂未知所屆也率舉所懷以進老伯試傾耳聽之亦以類爲知言而爲之首肯否

子倫毛先生九旬大慶敘

曲同豐

天地醇厚之氣恆聚於窮山僻壤而繁華輻輳之區不與焉余嘗走通都過大邑習見夫貴顯子弟聰敏英雋雅度翩翩視鄉曲之樸訥無文者奚啻霄壤乃曾幾何時而曇花一現倏焉漸

滅向之樸訥無文者乃迭經閱歷而知識愈澄神明愈固極艱難困苦而骨幹且愈凝是何也蓋智巧爲用不如仁厚存心者之可以持久變動不居不若靜穆自守者之足以有常其理固如斯也今歲余官都門與毛君俊可恕可兩昆仲昕夕過從常持此意以衡論天下士一日俊可出其太封翁子倫先生九秩壽啓見示且請余爲文以侑余讀之矍然曰吾向與子之衡論天下士者今可舉以壽先生矣先生世居黃巖溪山麓松篁蔽映一望際天附近居民舍讀書外惟以種山爲業有老死不聞車馬之聲者語曰山靜如太初又曰山深有隱君子先生蓋亦隱者流歟然余聞孔子曰仁者樂山又曰仁者靜先生居溪山

之中以耕以讀以孝友施于有政其哲嗣敬詮曾歷宰江西永
 新南康臨川浮梁彭澤各縣綽有政聲其餘亦均置身庠序孫
 輩且多宦學京都并有游學德國者則先生非真隱者殆所謂
 仁者乎孔言仁者靜山亦靜體也故樂山山歷古不磨靜亦歷
 久不變有可得壽之理故又云仁者壽先生居心忠厚言訥匕
 然不出諸口而為鄉里排患難及解囊周貧乏則慷慨任之不
 少紆回鄉之人挹其光儀仰若泰斗羣然以仁人推之其得壽
 也固徵諸孔子之言而可共信者今天下世變日亟青年學子
 恃其聰明才辯角逐于名利之場而急切圖功往往利一害百
 其尤者又或以不甘寂匕樹援結黨旗鼓大張甚至同室操戈

而不悔若此者非惟禍民抑且覆國非唯不仁抑且不智而要
 皆動而不靜之弊有以致之其亦聞先生之山居自樂享高年
 長子孫保世滋大流澤無窮而知所自返也乎歲九月為先生
 攬揆令辰俊可昆仲將歸為家人介壽之禮因書此以進未知
 先生閱之亦以為然焉否

誥封朝議大夫毛子倫九旬壽序

周琮

古無以文壽人者有之自明歸熙甫始熙甫而後清姚姬傳曾
 滌生吳南屏諸先生皆踵為之而壽言遂以濫觴焉然夷考諸
 先生所作大都其功業文章足以信今傳後否亦必其至性至
 情之地迥異庸常然後為文以揚之舉一諷百頌美之語隱挾

黃巖田上清毛氏家譜 卷三
激勸之意以俱來非苟焉已也後有作者此意漸失其始由貴
顯子弟欲稱揚其祖父而其時之文人學士又或素通聲氣不
惜阿其意而爲過情之譽由是富豪大族尤而效之踵事增華
羌無故寔不惟爲識者所鄙卽其家賢子弟亦有引以爲歉者
斯則變本加厲而文品乃以愈下矣琮不學無文讀顧亭林一
作文人更無足觀之言尤競匕致意故比年來塵海馳驅曾未
涉筆爲文卽偶有叩門請者亦皆謝絕而去今歲與毛君俊可
恕可兩昆仲同官京門習聞其家世頗有漢萬石君遺意心嚮
往之不置一日俊可出其大父子倫先生九旬壽啓見示且謂
願得一言爲侑琮受而讀之作而言曰先生真今之人瑞也雖

身安儒素未有功業文章焜燿一世而庸德之行庸言之謹皆
足矜式鄉閭發揮而光大之其有益于世道人心者不淺又安
敢以不文辭先生賦性純篤事太封翁鳳池公必誠必謹偶遇
拂意輒率子弟輩長跪請罪不命之起不起太封翁晚年遭目
疾扶持出入跬步不離飲食必擇腴美者親致於前棄養後哀
毀逾恆猶以未報親恩爲憾其時年六十餘矣而孺慕之忱至
老彌篤其事親之誠有足稱者毛氏自城遷黃巖溪已閱五世
規模草創未有祠宇先生以將營宮室宗廟爲先特倡議立祠
祠立復議修譜嘗曰祠者祖宗之靈爽所式憑也譜則上自祖
先下及子姓本支百世之意胥於是寓不可不有以成之經營

數年卒以葳事其敬宗收族之誠有足稱者次君敬詮以拔貢就職分江西迭署永新南康縣事迎請就養先生以譜未就緒而南康且有教案不即往惟屢以學道愛人馳書誥誡迨調任臨川先生知臨川民情純厚欣然就道到署後惟闕正誼堂全書分類摘抄以自適已事聞鞭朴聲則怒然不安曰古人以德化民者當不若此迨敬詮解任浮梁即買棹歸里終以居官擾不若居家安其他若造橋梁賑貧乏排難解紛力所能任者必委曲成全其心乎愛人利物又有如此者以故先生雖僻居黃巖溪無赫赫盛名而性情周摯善乞迎人鄉之人得其一言重於九鼎置諸獨行傳中蓋無歉然所謂隱君子者非耶孔子謂

仁者壽中庸言大孝必得其壽先生之篤於親厚於宗族其孝也存心愛民屢懷濟眾其仁也能仁且孝其得壽固有可券者而不但此也先生哲嗣五梅友上舍敬詮大令今年皆六十餘叔鼎茂才剛甫國學季謙法政亦皆在不惑知命之期將來得壽當可繼軌先生文孫十四人其長者若潛如遊學日本毅可遊學德國俊可爲技正恕可爲士官遜可爲工程師又皆蒸匕然有日上之勢曾孫七人徹禮居首亦已入京都高工學校餘並肄業於里門之中小學以後造就殊未可量而要皆先生之盛德有以致之琮熟悉先生家事而自宦學浮沈頗多世道人心之感今就所知者詮發之詞雖不文庶無戾乎明清諸先生之

遺旨歟歲九月俊可昆仲將歸爲家人介壽之禮謹書此以進
先生閱之或當以珠爲知言而爲欣然晉勺乎

毛子倫先生九秩大慶壽言

張元祐

中華民國八年歲次己未夏正九月初六日爲黃巖毛氏封翁
子倫先生九十攬揆良辰敬誼大令偕昆仲率子孫行家慶禮
且觴戚友之來祝嘏者文孫恕可與予同事都門先期奉親命
歸爲祖壽並以徵詩文啓分贈友朋諸君謀所以公祝者屬諸
下走余思先生孝親友弟教子課孫樂善好施敬宗睦族諸嘉
言善行知者綦詳述者且備欲再爲引伸未能加美過事鋪敘
則又近譽且敬誼大令以拔貢就職分江西歷知永新瑞金南

康臨川浮梁彭澤縣事恕可弟兄亦各蜚聲政學界碩彥宿儒
交遊廣達壽域宏張已不乏典麗鉅文表揚盛德而余則以古
今致壽之道不出於論語仁者壽一語先生仁厚卽壽考之徵
又曰仁者樂山先生世居黃巖溪在縣之西其地夾兩山間山
居之人多壽殆信而有徵乎余聞恕可云吾家多壽者相吾祖
今年固九十矣而吾伯則六十六歲吾父亦六十一歲諸叔亦
各五十餘歲皆健全如少壯時推而上之吾曾祖吾高祖壽皆
八十餘焉雖潛德令聞不求表見於世要其行善於鄉積善於
家凡所以壽人壽世者實足爲鄉里式今吾祖德行之敦厚與
年壽之綿長者良有由也余卽恕可之言證以仁壽之說益信

先生之壽爲無量壽世人以七十爲古稀能如先生之神明疆固逾七十而八十而九十可謂稀而又稀矣以仁壽推之歲月方長尙未有艾也蓋百歲老人史不絕書在他人多假爲企羨之詞在先生寔爲可操之左券耳先生有子五人孫十四人曾孫七人或騰譽於政界或蜚聲於學界或致身於軍界或效力於寔業界其青年壯士或留學於德國或就學於內地各校後福興隆正無涯岸區七暮歲松柏之頌固不足爲先生述也余聞有隱德者必有厚福先生不欲以赫々之名震驚流俗而恬淡退讓僻居山澤間外有海島之奇觀內有林竹之蔭蔚耕桑自課樵牧與娛泊然無求於世其美意延年所以頤情養性者

馴至百歲百十歲直意中事非他孤根薄植偶然秀於蓬蒿叢莽間者比也孔子曰仁者壽釋之者曰靜而有常故壽荀悅曰性壽則能用道惟能用道則性壽矣苟非其性也修之不至也先生之壽可謂能靜能仁矣可謂能用道而備之矣先生其亦颯然而舉一觴乎謹序

毛子倫老伯先生九旬大慶

褚傳誥

天台人明經

江介頰年築養堂白頭邁父身康強黃金難買如瓜棗獨得神僊卻老方封翁家學守青箱累世薦紳翰墨香館穀硯田懸十指廢著端木料衣糧滿籬遺子薦黃羊畢竟衣冠重顯揚庭訓十年稽古力後昆一一隸膠庠就中拔萃縮銅章五袴聽歌彭

蠡鄉潘岳板輿親引導盈城額手古靈光歸來大耋黃花黃時
還讀書啟縹囊語錄甄蒐成善本沈麟士廼不尋常有時吟興
愜尤楊隨意命篇感海桑醒世傳爲擊壤集畫圖應媿樊湖陽
滿前羅拜獻瓊觴衣綵鬚眉亦老蒼堂上同作楚萊舞喜公手
握磻溪璜

柯驊威 丁酉拔貢

好山好水邑之西天然圖畫黃巖溪兩山夾水地多竹竹林深
處高賢栖高賢抗懷黃農世心齋坐忘養木雞九月黃花香晚
節一尊綠酒現天倪憶我壯時遠負笈情話頗與小毛愜霞郡
書堂鼓篋歌武林講舍披襟蹠小毛告我克家難家法森嚴人

悚立大父不忍撻及門吾父分過恐不及大父有時讓家人吾
父引慝彌汲汲深於友愛如出家荆花含笑堦簾洽永言孝思
如王褒蓼莪飲泣裳衣濕鄉鄰鬥者忍難捐排難解紛師仲連
親故貧者喪未葬停舟贈麥學忠宣自我奉檄到江右寄書誥
誠詩百篇臨川土風最敦朴允我迎養娛天年日抄性理不辭
倦一聞鞭朴便生憐吾父吾父仁者流純嘏庶幾錫自天我聞
斯言初疑過由今思之疑悉破古曲雖高今人難豈和粹然養
太和福壽從人作不然耄而門阼衰縱享高年何足賀賀公身
康強明王行稅駕賀公子逢吉孫曾又滿舍我欲登堂侑一觴
無奈才非陳驚座可否拜賜天上桃俾我得補山中課

王舟瑤

厚德羣傳毛澤民歲寒松柏後凋身觀書老眼明於月對客齎
光盍若春有子歸來彭澤宰詰嗣敬詮大令遭國變從彭澤解組歸如公合是漢陰人

白頭簪得黃花滿笑倩孫曾整角巾

家指黃巖溪水濱所居名山黃巖溪山林歎傲足生平松篁夾道鳴琴韻雲

碓沿流碎竹聲地多竹鄉人以雲碓製紙泉石愛耽蓬戶趣風塵怕受板輿迎

臨川就養飄然返自適高人古性情

抱樸含真太古民超然物外置閒身一堂四代蕭思道九秩高

年杜子春燕國家祠成傑構手創宗祠老蘇譜學得傳人命敬詮纂家譜瑤環

瑜珥森匕起中有擔簦西海濱文孫毅可游學歐洲

憶昔曾開七秩筵侑觴熙甫有文傳公七十時余有贈序壺中日月春常駐
嶺上松筠老益妍塵世已經桑海劫先生真是地行僊期頤當
見中興盛人瑞熙朝重大年

朱謙舉人江蘇謙補用同知

亂後歸來彭澤令故園種菊為娛親柴桑領略晨昏趣梨棗懽

愉杖履春黃髮婆婆怡晚景白頭侍奉有幾人鏡詮同年伯仲年皆六十餘矣年

年不放秋光去半嶺朱霞擁大椿

有子能為慈父母先生合德自延年浮名久撇人間世健態真

同地行仙先生耳目聰明如壯年一代文章歸隱逸三秋風月助詩篇家居以詩文自

娛蘇家兄弟皆奇士譜牒源流溯老泉命鏡詮昆季修家譜已成

如此溪山合隱居西風禾黍莫愁余徐公通介羞隨俗晉代衣冠兒劫餘瓠葉歌聲嫻習禮菜根譚味厚觀書先生好觀善書森森水竹濃陰裏似勝臨川駐板輿鏡任臨川時迎查官舍

懸弧令節遇重明今日西京老伏生環堵自多閒歲月蒲輪無復見承平金樽滿注茱萸會玉葉紛披琪樹榮諸孫世兄皆助學多才且有游學西國者故國幸留喬木在枝頭時聽祝鳩聲

官瑞椿蘇州候用縣

造福權輿積善根歸然鄉望布衣尊千春廟貌崇先德公手建宗祠百里官聲起後昆北海尊開耆老會西河派衍古風存階前蘭玉森森列轉眼扶搖九萬鯤

知公古佛證前修孝友應推第一流創業有成貽燕翊觀書無恙辯蠅頭丹鉛壽世光家乘山水何心滯客遊公板輿就養後以修譜亟於回里無心瀾

覽山四代同堂欣濟美康強逢吉允休休水

一家詩學舊傳名倖侂松蘿意倍傾山靜洵徵仁者壽秋高喜得氣之清不須服餌參方術肯把鞭箠溷性情公仁慈在抱在署厭聞鞭朴之聲

今月萊觴佐蘭膳笙咳一曲譜新聲
藹七和光分外春仰橋俯梓後凋身九秋佳色餐新鞠一樹濃陰擁大椿西望蟠桃正璀璨南來老鶴倍精神提壺同上彭錢壽都道先生太古民

林庚修明經

疑是前身漢伏生好山西隱日遊行汝南五子賢同傳江左三
儒儁有聲

先賢傳有周氏五子郭泰周顛下壺
三人著名江左公喆嗣五其三爲儒

升斗一官花滿縣旨甘

九月菊爲羹孫曾莫辯人多少也學汾陽不問名

數來甲子逾五千山裏逍遙不記年爲善一鄉留隱德鈔書萬

卷述先賢

正誼堂書崇尚
理學公手鈔之

狂流身世更番換家學淵源小序傳嗟

我龐眉六十七舉觴醉向老萊前

屈映光 山東省長

水竹緣山綠到門黃巖溪上卽桃源掀髯映雪神仙古倚杖看
雲笑語溫丹訣細書銅錄紙詩箋常誠蒺藜園會昌七老尋常
事獨坐金庭結上根

藍輿迎養賦西征來往風流有惠聲譜輯文安敦孝友書譏武
健勗慈明報詞有撰香山曲宜慶還傳國士名仁壽橋邊功德
水照人簪菊進瑤觥

朱文劭 進士

天錫遐齡理孔昭如公名德隱漁樵桑榆獲永親庭日蘋藻追
思祖廟祧布被清芬遺後輩板輿佳話記前朝溪山合是長春
地上有靈椿翠不凋
九秩懸弧逢九月延年喜晉菊花觴滄桑閱歷經三世蘭桂續
紛聚一堂有子能如陶靖節在山今見郭汾陽箋詩愧我分家
學勉和幽風介壽章

毛濟美 明經太平族人

蒼溪子倫宗丈於今年九月六日九旬大慶賓鴻北至傳來雲外之緘仙鶴南飛催弄江頭之笛美久欽德望幸附宗盟雖蓬島開筵未親鳩祝而麥邱寄頌莫罄驩忻詞銘菊而難工心獻芹而培切施瞻偶效也隨詩客題糕巴曲遙陳聊助老人噴飯歸然同拜魯靈光五百名賢聚一堂已羨高年逾大耋况兼佳節近重陽仙山日永椿常茂老圃霜清菊更香明是歲星偷入世金門誰為識東方

鍊籛遙吹赤壁磯臨風齊奏鶴南飛太邱德望人咸重高允聰彊世所稀綺席千觴酌菊醞華堂四代舞萊衣秋宵獨倚寥天

看南極星明接少微

倚醉橫拖綠玉筇精神矍鑠氣從容長生有術惟修德繼起多才必耀宗繞砌新芽森玉樹當庭密蔭仰喬松知公定隸東華籍真率耆英嬾過從

巢南棲北氣原聯頌禱情殷寄短箋一脈曾通丹井遠 余族在台者皆

係唐丹井處七後五常况識白眉賢 嗣君五人余僅識鏡泉先生慈容和藹人疑佛福報

分明我信天豫約期頤開慶日摠衣準再拜華筵

童亮曦 明經

壽星何事謫人間九十光陰迭往還庭畔喜添羣玉秀膝前環舞綵衣斑恩承世澤簪纓起寵荷天厨祿秩頒却羨浮梁觀政

後飽看春色蔚家山

豔說封翁作壽翁身閒德懋福攸崇行將百歲希高允坐有千

樽學孔融蒿日時艱圖返駕關心家乘告成功回思童試經臨

邑得識荊州拜下風

曩昔應童試時遇世伯於義城嶺始識一面

靈椿高聳映瑤池壽考康甯兩得之既往年華如客過未來歲

月爲翁遲天隆福報昭公道家聚耆英紀盛時

世伯長次兩嗣君皆年逾花甲

五

子七曾孫十四賓筵允合譜新詩

憶昔先嚴七十秋家人釀酒勉相酬何期我乏回春藥又喜公

添益壽壽鶴算問誰同父執鴻文應更待朋儔遙知重九前三

日賀客盈門各獻饀

卿雲靄七煥蒼城知有羣仙獻玉觥九曲錦屏圍坐處老人星

照畫堂明

九秩筵開笑展眉及門四世見孫枝荀龍薛鳳森七列齊着斑

衣舞玉墀

懸弧更喜值佳辰菊酒松糕次第陳滿座祥光團不散靈璫聲

裡宴嘉賓

炯七方瞳發異光知公壽比佛無量他年再慶期頤日準擬躋

堂晉玉觴

毛鼎信 溫嶺族人

毛鼎言 溫嶺族人

蒼城耿耿耀祥光報說仙翁晉壽觴遙聽歡聲雷樣震笙璫音裏頌陵岡

古貌藹然瑞玉温如公齒德信兼尊芝蘭玉樹森成列天遺禎祥聚一門

吉星長照吉人家滿座璘彬燦若霞除却高陽舊里第世間那得此清華

四世孫曾列滿前白頭人醉菊花天蓬萊更覓安期棗預備重開百歲筵

秋月行

集李青蓮句并攷其體

林丙修

進士蘇州候補道

秋月明九日天氣清軒師廣成結髮受長生公乎公乎食不噎

南斗上生籍九十誦古文含笑坐明月覺來相思生白髮積德為厚地千齡光本支借問宗黨間吟弄惠風吹云是古之得道者意氣相傾山可移

公行善造德節錄正誼堂書為格言宗祠族譜其尤屬意者

君家全盛日鳳毛出英姿毛子能穎脫更着老萊衣有德必報之大雅譎螽斯河陽花作縣昔在九江上歷職吾所聞忽遺蒼生望君不見元氣是文康之老親以求長生樂過千春明宰試舟楫只今惟有西江月明月直入竊藥駐玄髮

貴公子五孫曾二十有一德報厚矣次公

歷任江西劇邑鮮組歸

借問往昔時尙識仙人面隱居山可得見客到但知留一醉嗟余沈迷恭陪竹林宴攝衣凌雲霄舉手來相招捫蘿石逕行但

愛茲嶺高高乎視低重光疊輝投迹歸此地遠惟千載期邈仙

山之峻極兮一揚眉曾向長生說息機昔留飲其家邀至大鴈山看千

勢皆合推應移
高與對山稱

蒼七雲松松寒不改容吾亦澹蕩人親見安期公羣雄方戰爭

龍虎相啖食成此禍胎舉酒太息我已七十而孤栖何必組與

珪有婦忝齊眉兒女嬉咲牽人衣脫吾帽向君咲七酌黃花酒

始知金仙妙君起舞貌稜七高張清心手中萬歲胡孫藤猿鶴

時聞巖下音值此時局南北紛爭亂未有艾城居不如鄉
行年七十退隱久已每動入山必探之感

壽星明

吳承烜歙縣人

名士光輝處士光輝星明少微看隨班祝嘏鳳毛繼美懸弧誌

慶齡背延釐九十日齡背
見劉世釋名仰矚南喬俯瞻北梓素柰森七白玉墀

誰得似恁孫曾繞膝彩戲萊衣襟期只有天知合五世同堂福

履綏况仁風翔洽載賡麟定祗雲繁衍載詠螽斯燕喜徵祥象

賢纘緒筍孝將無竹亦慈流澤遠是淵源家學傳補毛詩

天一資生地八資成乾坤秀靈試遙為雀賀老人南極自慚蠖

屈謂煩僑
寓海東逸叟東溟伍佑東
有東溟公壽九旬余年六秩廿五絃彈對月

明謂公長短二
十有五歲搔首望望津通析木張角分星謂公孫自京
郡函來徵詩而今會

結耆英有道德文章著典型待重陽九日莫囊辟惡先期三日

菊殘延齡謂公月初生
日在九六日華祝三多箕疇五福詩禮薪傳勝鯉庭鍾

毓久喜花開仁壽草發科名謂公次子拔入萃科
清代歷任西江州縣

爲大毛公爲小毛公怡七友恭記鷄鳴問寢愛如冬日雁行有序穆若清風菽水承權蘭陔補句春在先生杖履中環左右侍翩翩薛鳳濯濯荀龍謂封翁有公子五公孫十四合曾孫七儒宗矍鑠而翁謂業儒湖課讀幃燈一點紅想校書劉向五更藜火握符潘岳百里花封雲出無心陽隨有脚竹馬爭迎到短童游化宇有轂行夾鹿絃送飛鴻

一代經師一代人師青氈少時甚孳齟學語晏楹芳漱澄心眇慮范硯香滋貽厥孫謨繩其祖武瓜瓞綿七衍有本枝餘慶慶靈根永庇累葉重熙欽遲揚顯英奇效毛義因親捧檄馳翳板輿迎養六潭縣北六潭在黃巖縣北弦歌化俗九派江西凡著官箴悉遵

庭訓卓異循良入口碑鶴觴遞俟十年獻酒再祝期頤

喻長霖 榜眼

是吾黃西鄉靈光魯殿 迺中天南極老人壽星

章 棧 翰林

南天壽星照遺老 江西廉吏娛邁親

王運璣 舉人

九十老翁是靈光魯殿 六旬男子有大小毛公

楊 晨 翰林

大毛公傳詩介壽 老萊子舞綵稱觴

楊道淵 知事

山居享上壽九旬共羨松姿如古佛
嶽降先重陽三日好憑菊酒祝長生

鄭文易高等
廳長

桂樹垂珠教傳詩禮 菊英薦酒壽永鼎彝

王世長法政
畢業

躋八秋又九齡椿樹行看登百歲
先重陽只三日菊觴剛好祝千秋

張元祐

見佛子心是壽者相 則篤其慶載錫之光

於達 毛鏡仁 嚴元照
張國華 王保艾 劉祖遜

已來九十未來九十 春實八十秋實八千

魏企英

賦性謹純得天者厚 宅心仁善多壽之徵

王振漢

願效嵩呼歌上壽 還隨萊舞祝期頤

章不敏
吳元道

三百傳詩萊衣滿膝 九旬大壽莫酒稱觴

韓錫璜

奇壽得天厚 古風存世模

柯驊威
王詠蟾

世德衍毛公平生絳帳談經五株丹桂高枝挺
耆英追潞國此日金鑾就室一路黃花映節香

柯 玫

有子成名處為一代名儒出為萬家生佛
惟公修德壽則九旬大慶福則五世同堂

趙次勝 知事

聖人言仁者壽惟我公林泉養望上迓天和由耄耄而期頤不
必羨潞國榮封合公厚祿
小子曾宰是邦與次公晨夕相依備詳世德本篤謹以垂裕允
足媿石君馴行王昶純風

王鵬展

魯靈光殿下倡景福 漢萬石君上迓天和

張松盛

佳節近重陽會當桂酒留芬菊樽新獻
高年躋九秩欣看蘭孫挺秀萊子舞衣

王曰興

四代傳經是謂通德 一門訓善惟以永年

毛 訓

五男舞彩五代同堂奉持五種遺規五福誕膺椿壽永
九月懸弧九旬綿算恰合九如天保九秋共晉菊尊香

黃巖山止洋毛氏家譜 卷三 藝文 三九 三 眠國庚申年

解映台

詩酒谿山是壽者相 富貴鐘鼎閱太古春

黃象熙 舉人臨川人

治冠西江君子有子 星輝南極大年為年

翁守濃

椿花不老芝草有根預卜華堂羅五代

九秩已開百齡將屆重携菊酒祝千春

補錄八旬晉一像贊

毛訓

古貌古心福壽康寧時年八十一距今十載仍睥面而益身福
為壽徵壽為福根再閱一旬亦不減其精神吾將彼 時祝八千歲之大椿

秋晚泛舟

宗澄存草附

輕舟傍晚泛江隈水色天光粲不開波湧白拖新月入楓飄紅
逐夕陽來隔溪漁火煙如縷對岸沙鷗雪作堆萬籟無聲人意
靜推篷覓句幾低徊

園中蔬

朝擷園中蔬暮擷園中蔬園中蔬百本木本手自鋤豈無魚與
肉蔬味清且腴豈無花與果蔬性柔可菹齧根做事毋食苦養
心畚學圃存深意有懷樊子須

白牡丹

不爭魏紫與姚黃香國叢中號素王富貴也教人艷羨本來面

黃巖田上海手山家譜 卷三 藝文 四十 三 眠國庚申年印

目卻無忘

自嘲

一事無成六十春百無聊賴守清貧莫嫌老去貧如洗尚有鬚
眉白似銀

尚有鬚眉白似銀翻堪傲彼少年人幾多艷質春花似飄泊隨
風付劫塵

襍咏 六首

日暮亂風吹山楓落復起老僧扶杖歸斜入雲坳裏
梅林青嶂下茅屋白雲邊有美人如玉幽居不計年
天道惡滿盈人事忌驕恣花好未全開留得不盡意

春藏古洞裏花發不知年未受人攀折枝柯得自全
小儒小有知逢人自矜異鴟鳥嚇鷓鴣是爲不知類
世道日以衰人心日以巧巧者拙之奴勞人徒草草

咏史

晉文亡在外備歷艱與險返國尙無期老至已冉冉奈何懷齊
安敗名不自檢苟非內助賢雄圖誤筦簞晉覆^霜姜未迎豈其早
忽奄嗟哉晏安毒脫然誰不染
夫差痛父仇庭立日告語三載敗夫椒威聲遂大著豈意西施
來頓使東吳去蘇臺花草春沼深不知處甬東未可居之死悔
猶豫嗟哉溫柔鄉滅國何其遽

漢王入秦關首踐王秦約約法僅三章王度亦寬綽奈何戀秦宮處堂若燕雀財色兩撓心失卻英雄略樊張不力爭楚炬同焦灼嗟哉美麗場誰能定立腳

莊宗負俊才三矢承託付滅燕遂襲梁慷慨楊劉渡詎意羣雄平旋被諸伶誤哀哀絲竹聲慘慘汴梁路士卒盡分離君臣不相顧嗟哉安樂場溘亡若朝露

開元御宇初直繼貞觀美輔政任宋姚明良廢喜起奈何冊貴妃甘蒙新臺恥鼙鼓震漁陽胡兒盡蛇豕馬鬼不與尸唐亂未終止嗟哉聲色場流毒靡涯涘

觀花有感

造化小兒工造作倏使花開倏使落花開蜂蝶亦精神花落游觀都寂寞此開彼落幾推遷冬嶺孤松秀自若歲寒後知本無心遑問李桃花灼灼自人觀念判榮枯漫與化工爭橐籥膠膠擾擾何時休一意兩營懸無薄我聞佛云色即空又聞孔云無適莫苟知此理任自然隨遇相安常綽綽

自述

行年六十萬事漸畢更有何求曰惟愛日昆季五人我居其次或讀或畊各安所事亦有孫子次第長成箕裘分紹濟濟英英維我嚴親頽然老矣每念及茲一懼一喜終歲居鄉來城小憩去住不常惟心所契九十老翁靈光魯殿巋然獨存曷勝眷眷

行止起居宜防衛之飽煖飢寒宜調劑之吾兄吾弟若子若孫男女大小各致溫存烏鳥遂私白華補逸寸草三春庶報萬一

感時

外患方長又內憂錯薪釜底有誰抽假威惟見狼當道謀國無非貉一邱童貫應金終購禍德光助晉豈同仇債臺况復高千級未識他時避得不

王幹廷營長堂上八秩徵詩為賦四律和原韻

武勇羣推王子華公素習奉勇澄清有志快登車昔年藝黍厘烏哺公

養親故骨輟讀歸農此日千城屬免置冀缺有妻能繼志公自趙夫人來歸偕視寢膳始投練軍著績

游升都司嫖姚謀國不為家功成還敘天倫樂迎養歸防共拜嘉

外患頻仍西復東鳳毛濟美有終童公詰詞幹臣營長童年即入榆關武備學堂榆關習

武偕燕士衡嶽鍾靈競楚風教子遠師曹武惠宋人詠曹武惠詩有教子三登上將臺之

句談兵近法李文忠鯤丸鵬萬知何極先導原來仗乃翁

宦成名遂賦歸與公因裁并練軍即乘機請假竹杖芒鞋足自娛弔古偶來吟

楚澤懷人時復上蒼梧整軍經武憑兒輩酌酒評花讓老夫祇

此忠心能耐久公寓書幹臣營長以古名將雖冀及惟望勉為忠實耐久今賢即與古賢徒

南來飛雁寄雲箋報道先生啓壽筵堂有槐陰榮累弈天教梅

月証同圓十一月十六為公攬揆之辰賓朋半是香山老齒德羣推洛下賢我

亦椿庭纔祝嘏家嚴壽屆九旬九願分菊酒頌延年菊一名

黃志澄君以堂上雙壽徵詩為賦一章

黃巖田上洋毛日家譜卷三
我自作宦到章貢始識黃君賢昆仲昆仲並嫻韜略才疆臣方
恐潢池弄陸軍教授遠借材填簾合奏君其來何期武漢風潮
緊倏忽捲入西江隈自此滄桑成變局風流雲散如黃鵠我從
彭澤解組歸君亦還家矢弗告家居愛日日正長天倫樂事樂
未央今歲開筵祝大嘏徵詩重補南陔章木公手扶杖國鳩金
母花甲纔一周舉觴迭晉延齡酒元宵初過又九秋更喜蘭孫
剛燕爾合歡共慶多受祉新婦羹湯老子衣濟濟一堂齊鞠臚
吁嗟乎國勢紛爭家太和由家推國柯伐柯安得家家盡如此
杯酒談笑息兵戈杯酒談笑息兵戈寰海鏡清靜不波與君共
登仁壽域堂上樂意當更多

趙申之大令以元月三日堂上壽八秩徵詩爲賦三律

天半翔雲一鶴來盛傳桃讌啟蓬萊答暉新茁三春草祝福方
開萬樹梅介壽欣看眉有樣忘憂恰好酒初醅寄言願共椒漿
獻歲歲年年醉此杯

憶昔栽花滿縣時飛雲親舍寄遙思子都已共神明奉令伯猶
懷烏鳥私清夜焚香繩舊德白華表潔補笙詩媿余幸托椿庭
蔭菽水承歡尙有虧

元珪昆季盡琪瑰鷓鳳尤非百里才振翮行看翔北海擊鮮先
自譜南陔升堂拜母庖多范舞綵娛親主是萊直待扶搖程遠
上大開華幄慶追陪

讀南北史

晉政久不綱羣雄爭傑出南北旋溝分僭立猶十七吾聞西聯
邦統尊若輔弼如何中夏君豕蛇任奔軼痛哉國為墟蠢哉禪
處益黃雀伺螳蟬漁翁利蚌鷸天意假強胡偕亡指時日安得
真人興風雲生叱叱

讀唐藩鎮傳

唐設節度使政權歸武臣變本更加厲擁立由軍人始焉請留
後繼焉求即真各擅強兵衛羣聯與國姻甚且為帝制不復利
王賓紛擾六十載割據兩河濱問今是何世軍屯遍九垓

讀五代史

傳國至五季國勢日分離臣都長樂老君亦已殘棋泰西設總
統數歲一更移中夏本世襲如何與等夷僭王十有二豈仿聯
邦規蠻觸爭未息壘卵勢垂危契丹方狡起伺我北山陲奈復
千載下效顰有東施

後唐明宗言貪吏者民之蠹也論

以後六論皆課澧孫改本

凡物莫不有蠹木之有蛀木之蠹也米之有蛆米之蠹也桑之
有蟻桑之蠹也稻禾之有螟蠖蝥賊稻禾之蠹也其種類不勝
枚舉吾以為物固有之人亦同然人之蠹何貪吏是也後唐明
宗言貪吏者民之蠹也信哉斯言夫吏者所以治民者也見於
史傳者有良吏有酷吏良吏者愛民如子民有利興之民有弊

除之凡可以安民之生者無不備酷吏者疾民如仇民有罪誅戮之民有過羅織之凡可以致民之死者無不周至貪吏則不必致民於死而實足朘民之生其所設施大都惟利是圖吮民脂膏飽已囊橐追呼所及鷄犬不寧每至農不得耕女不得織商賈不敢出於其途其害雖不及酷吏之暴而使良善者皆無可營生則實視酷吏爲更甚孔子曰苛政猛於虎苛政者酷吏之政也其與貪吏較一毗于陽一毗于陰毘於陽者以猛致民死故曰虎毘於陰者以柔朘民生故曰蠹也抑又聞之程子曰農工商各有所職而士獨無事是爲天下一蠹竊以爲吏之蠹由士之爲蠹而來也大凡吏之出身不一其途而由士起家者

居大半士而爲蠹則無所事事初不知修齊治平爲何物及其爲吏怵於固窮身家之念重溫飽之計生不折入於貪而不止然則欲清蠹吏之源其去士之蠹亦一嚆矢矣雖然今天下蓋無一不蠹者也游士者士之蠹也惰農者農之蠹也竄工者工之蠹也奸商者商之蠹也驕兵悍將者軍之蠹也雖無貪吏亦無一非蠹而況有貪吏以爲蠹中之蠹天下其不盡壞於蠹也哉然則去蠹亦有道乎曰有爲農而能勤稼穡則農不蠹爲工而能精技藝則工不蠹爲商而能重信不欺則商不蠹爲兵將而能捍國家保土地嚴守軍律毋驕橫以自恣則兵將不蠹而其要則尤在爲士者勤其修爲勵其節行大之可以治國小之

可以安民然後上而爲相下而爲吏以我之不爲蠹者範天下使皆不爲蠹又何蠹吏之有雖然是更在爲國者正本清源有以端天下之士習而不至爭驚於他途嗚呼其難言之矣

漢高帝斬丁公論

同一人也同一事也今日爲德明日爲怨今日爲功明日爲罪其所以爲德爲功者又我自求之而彼始應之在我亦已心以爲德與功矣而忽違其初心反以爲怨與罪又非其心之實以爲怨爲罪而姑借怨與罪以歸其獄而定其案此宜爲事理之所無者而在霸王之操縱天下銜勒後世則往往自爲而自反之不以爲怪丁公爲項羽將逐蒼帝彭城西短兵接帝急顧曰

兩賢豈相厄哉丁公乃引兵還及項王滅丁公謁見帝以徇軍中曰丁公爲項氏臣不忠使失天下遂斬之曰使後世爲人臣無效丁公司馬溫公作通鑑謂高帝戮一人而千萬人懼其慮最爲深遠吾竊謂不然丁公之不忠於項高帝使之也使人不忠而乃斬之以爲不忠者戒彼之爲慮特與挑楚人妻者等耳楚人有兩妻者人挑其長者長者詈之挑其少者少者許之居無何有兩妻者死其人取長者爲妻而棄其少者曰居人所則欲其許我爲我妻則欲其爲我詈人丁公之引兵還是許高帝之挑者也高帝之斬丁公是惡其許我挑而棄之者也丁公之許人挑信有罪矣獨不思彼之許人挑果誰致之乎我挑人而

人許我匕卽以此爲人罪反之於心乃不以自歎而反以之戒人耶後世帝王起事敵國之臣有拒我者則誅之有降我者則貴顯之以爲勸及既得天下則於降我者漸鄙棄焉而褒揚其拒我者以爲天下後世之事二主者戒此亦如取長妻者之故智然於拒我者而褒揚之尙是卽乎人心之安而合乎天理之正獨於許我挑者而誅之顧不自歎於心三代聖王吾蓋未聞有此也莊子曰竊鉤者誅竊國者侯侯之門仁義存此殆卽侯之門之仁義乎吾無以名之名之曰是爲霸王操縱天下銜勒後世之術

齊家以修身爲本論

家者身之所由積也無身則何以有家是故家之中有父母焉由身而上推之者也家之中有兄弟焉由身而旁及之者也家之中有妻子焉由身而下暨之者也新學家之言曰遺傳性以一家之人其得於天然者與我身本相同也舊學家之言曰習慣性以一家之人其得於人爲者於我身亦無異也欲家之齊其必本諸身有斷然者雖然本諸身而身或不修則猶未得齊家之本也齊也者有整齊之義焉不修則身且不能自整而家何以能齊匕也者有齊一之義焉不修則身且不能自一而家又何以能齊舜之克諧又能齊其家者也而非本乎身之溫恭允塞則嚚傲之化無由閱之父母兄弟無間能齊其家者也

而非本乎身之致孝格親則衣蘆之憾難泯故卽以遺傳性言必一身之性能率而後可率一家之性否則遺傳者不必善而不得謂之齊以習慣性言必一身之性能復而後可復一家之性否則習慣者或爲惡而不得謂之齊如形影然其形正其影斯端如源流然其源遠其流斯長固非可以無本之學致之也後之言齊家者不察乎此或以嚴爲本或以寬爲本或以容忍爲本其究也本嚴而身不修家人嗃匕有反唇相譏而謂夫子未出於正天性之親因之日滴者矣本寬而身不修婦子嘻嘻有流蕩忘返而謂禮法非爲我設家庭之際致失其防者矣本容忍而身不修敷衍爲工羈縻度日家翁以癡聾自處子弟以

欺謾相將性情不真天倫之樂因以全失者矣夫身者家之分子也家者身之本系也大學言欲齊其家先修其身誠以身能修而家道正其意自摯其情自通不必求嚴而亦嚴不必求寬而亦寬肅肅雍雍太和一室更無事乎容忍斯乃家齊之實效也由是而推焉國與天下卽家之推而大焉者耳治之平之舉而措之不難矣故曰自天子以至於庶人壹是皆以修身爲本

管仲不死相桓論

臣者所以輔君安國家治人民非私徇一人而生死同之遂可謂盡臣職也秦漢以下此義不明不論其君爲何如君其君之之死爲何事死但以臣能死君卽謂之忠非是者皆不免有遺

議殊未合乎孔子之意孔子論人範圍甚大不拘一格以殷紂之亡國而微子之去箕子之奴得與比干之死並列爲三仁夫三子皆宗親也紂以不仁亡國宗親不必皆以死殉則非宗親者可知子羔子路同仕衛值衛孔悝之難子曰柴也其來由也其死於來者無貶辭於死者無褒辭則非概責之以死可知桓糾爭國管仲召忽奉糾出奔厥後魯殺糾召忽死之管仲爲桓相孔子許其爲仁且謂其不若匹夫匹婦之諒則仲之不死而相更無復遺議可知後人不察乃或以爲桓兄糾弟或又以爲桓已入國爲君一國之人皆爲之臣臣不得仇君故可以不死而并可爲相此皆就一格論人委曲遷就未悉乎孔子之意也

試更証以晏子之事崔子弑齊君晏子立於崔氏門外其人曰死乎曰獨吾君也乎哉吾死也曰行乎曰吾罪也乎哉吾亡也君民者豈以陵民社稷是主臣君者豈爲其口實社稷是養故君爲社稷死則死之爲社稷亡則亡之若爲已死而爲亡已非其私暱誰敢任之據此則臣之死君惟君爲社稷死者爲義所當然否則皆非其例且復以豫讓之事証之豫讓爲智伯復仇其先固中行氏臣也襄子問之豫讓曰中行氏以眾人遇我我故以眾人報之智伯以國士遇我我故以國士報之豫讓此言與孟子所謂手足腹心草芥寇讎者同意則臣之以死報君亦當視其君臣間之恩遇而非可概責之泛泛者流總之天地生

才將以安國家治人民者也其人有安國家治人民之才必因一君之死使殺身以徇之則與三良之徇秦穆爲詩人所譏者無異不惟非造物生才之意亦非天下國家之福矣故固論管仲而縱及之

流水不腐戶樞不蠹論

洪鈞剖判儀象畢呈雨露風雷其流質也星辰日月其樞機也融之化之闔之闢之摩蕩不已而人乃生於其間是故人之始生卽挾流動之氣以俱至晏安逸樂乃其死機勤苦憂慮斯爲生氣蓋勤苦者鍊身之良藥也憂慮者鍊心之祕訣也不勤苦不憂慮則身心皆窳敗矣其將何以持久試觀乎水流則清不

流則腐試觀乎戶樞轉則靈不轉則蠹人身之有血氣猶地之有水也氣血停滯則腐氣乘之而痞結之病起人身之有筋骸猶戶之有樞也筋骸疏懈則蠹物入之而痿痺之病生故養生家有運氣之說衛生家有易筋之法皆所以求其流求其轉也吾人欲爲聖賢爲英雄爲豪傑雖不必襲養生家衛生家之術而勤苦憂慮寔爲鍊身鍊心之要素孟子曰舜發於畎畝之中傅說舉於版築之間膠鬲舉於魚鹽之中管夷吾舉於市孫叔敖舉於海百里奚舉於市又曰故天將降大任於是人也必先苦其心志勞其筋骨餓其體膚空乏其身行拂亂其所爲可見古聖君哲相其未發未舉之時天之所以鍊其身鍊其心者蓋

黃龍印上洋手比家譜 卷二
無微而不至庸愚不察乃欲於聲色貨利中飲鴆以求飽偷安以求適則腐之蠹之者紛至沓來其不至自喪其心身者鮮矣尚何足以當大任乎後世帝王以憂勞始以逸樂終卒至身敗名裂不可救藥如吳夫差唐莊宗輩者不可勝道余讀史至此每爲之廢書三歎故因論流水戶樞而備詳之

唐荆川信陵君救趙論書後

唐荆川論信陵救趙重責信陵而薄責魏王吾以爲信陵之罪魏王有以致之魏王之罪則持權而不達勢荆川所論皆以意遷就而非當時事寔也蓋趙與魏唇齒之國也趙被伐而求救于魏此事理之必然者史稱魏安釐王二十年秦昭王破趙長

平進圍邯鄲平原君數遺魏王及公子書求救魏是以有晉鄙之命是趙之救請明以王爲主而公子爲輔齊民之家欲有求於姻戚而其家有主必先求於其主而後及於姻戚以爲之助平原求救魏王而兼及信陵意亦猶是無足怪者荆川乃謂趙不請救於魏王而諄諄然請救於信陵果何所據而云然耶厥後魏王怵於秦王移擊之告止晉鄙軍不進而趙勢益急請救愈數通鑑謂趙使冠蓋相屬於魏讓魏救不至公子數請於魏王及賓客辯士游說萬端王終不聽夫曰讓魏救不至是趙仍以魏王爲主也曰公子數請於魏王是公子亦以魏王爲主也且曰數請曰及賓客辯士游說萬端是荆川所云激諫於王者

公子已無不盡侯生爲公子上賓亦必已竭誠進諫而言無不盡也如姬是否日夜勸未可知然以公子之急如此如姬之感恩公子如此以情理論苟知其事亦未有不力勸者然則荆川之責公子侯生如姬其非當時事寔則一也吾常論之信陵君者戰國四君之一其慷慨有爲能任大事遠出平原孟嘗春申之上若魏者則不明事理不識形勢一選悞無能之人耳夫以趙魏之利害相關公子之親而且賢王苟深知事勢則當秦攻趙時卽當外連五國內督羣臣舉國以屬公子亟亟然救之如救火然不必待趙之請更無待公子數請而王乃怵於秦之強偷安目前拒諫不聽致使公子計無復之不出於竊符殺將而

不得則信陵之罪非王致之而誰致之哉雖然信陵以竊符殺將之故卒能大敗秦師而趙以存趙存而魏亦存而楚燕韓亦俱存則功罪已足相掩孔子大管仲之功不責其不死之罪誠以論人者貴恕不貴刻以信陵相例荆川之論蓋不免失於刻矣且荆川誅信陵之心以爲不知有王是亦不然信陵於敗秦後不敢歸魏使將將其兵以歸是猶自知有罪而心知有王也後世跋扈之臣如操昭輩擁兵自重當戰勝後愈目無尊上謂爲無王信無王也信陵敗秦存趙有自功色一聞客言卽自責若無所容趙王以敵國禮見信陵辭讓側行自言有負於魏無功於趙則於本國之王其不敢上陵可知矣最後秦伐魏信陵

不肯還魏客毛公等諫卽色變趣駕合諸侯兵大敗秦師追至函谷而還是又信陵之大有造於魏君臣之間當可訢合無間乃未幾秦間一至王卽使人代將致使謝病不朝鬱鬱於酒色以亡則魏王之不明於此益甚荆川乃專責信陵而於魏王概從略蓋後世之論大都刻於臣而寬於君其由來遠矣非獨荆川然也然吾聞孔子曰君君臣臣孟子曰欲爲君盡君道欲爲臣盡臣道君苟不明而論者徒厚責于臣以自附於責備賢者之義則其臣必如轅駒局促不能用盡其才亦豈國家之福也哉

致張讓三先生書

昨奉一函諒已登覽弟此次告病本期一擊卽中詎本府王太尊出巡來鎮謬采虛聲特電達藩憲以弟官聲政績均好未便聽其引去乞批示慰留并轉告通判艾君謂弟在浮地方安靜若聽其引去另易生手致再出事變我等均要挑肩可以此意勸之回府後又復來書勸勉情意懇摯知己之感殊難忍置惟弟自念迂拙無能今年卽幸未出事而以景鎮坯工之眾臘月停工無可爲生計冬防之難若登天然未敢遽言無事也且弟一貧如洗前任南康臨川俱有賠累尙未盡數清償今年浮邑收漕又較上年遠甚若再遷延時日不急擺脫必致如水益深如火益熱查現在各縣賠攤各款日益加多卽以浮邑論教案

賈島田山洋手日家詩 卷三
三
賠款責歷任均攤爲數已不少弟以代理人員與正署之有廉俸者一律攤認揆之情理殊覺不合上憲當初派認時或未計及此否則何以領款獨少而出款必均又何以代理人員就不須廉就不要俸既無子房辟穀之能又無蚯蚓食壤之性將令稿餓從事抑令貪殘度日乎念此可發一噓現上稟求免教案攤款未悉能否邀准總之現在州縣萬不可爲先生來書已一語定案無論淮駁仍當再稟請交卸本因貧而仕乃困仕益貧弟也不才計之審矣先生急欲返山卽當躡屐相從其幸不我遐棄也恩也奉覆不盡欲言

重修臨川縣學孔廟記

孔子之有廟由來尙矣漢文翁治蜀作禮殿以祀孔子左右殿壁繪七十子像厥後漸推漸廣孔子之廟遂以遍天下宋仁宗慶厯四年詔天下立學仍各立廟而王介甫慈谿縣學記謂當此之時必州士滿二百人始得立學是以慈谿不得有學而爲孔子廟如故然則當北宋時各州縣尙不皆有學而孔廟亦尙不在學宮也臨川舊志載明嘉靖間因寶應廢寺改建縣學其初本在府治南二里青雲峰右宋咸平三年縣令陳公從易始建考咸平三年距慶厯尙三十餘載而臨川之學已建孔廟以立當舉世莫爲之際而獨能創始爲天下先則是邑學士之眾官紳之知所先務於此可見矣顧學之有廟卽古時釋奠先聖

先師之意也古時之學凡鄉射讀法養老尊賢使能考藝及一切受成訊馘之事皆於是行之故周禮大樂正大司樂及戴記王制所載升選移屏諸典所以勉士民之成才而戒其不率教者無不委曲詳盡其時人才輩出由學而進於朝者多德藝兼備之士孔子生際春秋古制未泯飲射之時蓋嘗躬親其盛其視後世之課詞章尙記誦博取人間富若貴以釋奠於廟中者不知陟降在上時復以爲何如也夫天下之勢窮極必返孔子之作春秋以殷之質變周之文今天下亦文敝之世矣朝廷銳意維新改良學務舉數千年重文之弊一旦掃除殆盡而學科之分課者首以修身次以經史次以地理方言天算格致體操

音樂等類夫修身者孔門德行之大原大學齊治均平之本也經史地理則文學之事而亦政事之所兼資方言則言語之所必須四方專對之才也天算格致體操音樂圖畫又皆周禮六藝之選由是而之焉士之所學駸駸乎有返本復初之意孔教之昌明可計日待矣臨川縣學自同治七年重修後漸就凋弊都人士以聖學重新而廟貌不加葺非所以壯觀瞻也適余承乏斯邑共謀所以修之集資鳩工經營不日殿廡宮祠舊時之所有者皆加修飭丹之麗焉奐焉闕數月而工竣囑余爲之記余惟臨川人文薈萃儒林道學代有其人而功名氣節之卓然可傳者尤指不勝屈值天下尙文之際有志之士猶能爭

黃巖田上洋毛日家譜 卷三
自振拔不爲習俗所移如此矧今聖教大興國家所期父師所
課方羣然以實學相責此都人士必更有勉焉孳也登聖人之
堂求合乎古時德行道藝之選不僅以繼武前哲爲美者斯則
修學者之所厚望也夫

稟兩江端督

大人閣下敬稟者竊某前荷憲恩命權南康於去歲九月初三
日接印視事正值民教交訐之後地方糜爛整理綦難某初涉
仕途才疎識短夙夜兢業常恐不得一當致以隕越貽羞日昨
揚令先震來康承示憲台以其辦理康事漸次就緒頗加獎借
惟以康匪初平勢同新造一或不慎遺孽恐將復萌深爲注意

命某將到任後辦理情形稟呈鈞覽某自念鯁生學步適逢險
道崎嶇不致傾蹶已爲幸事復何敢以視履之詳飾干聰聽惟
既爲憲意所注復何敢緘默自安茲特將某抵任後辦理情形
謹爲憲台呈之某蒞康初沿途密訪知縣屬開教各村如古樓
赤土朱坊舖等處居民皆慮大兵一到或致剿洗屯聚山寨者
每寨千數百人不等某以該寨中人良莠不齊不先設法解散
則眾心惶也擬而走險勢將不可收拾於是於接印次日即請
各鄉紳耆來城爲之痛陳禍福令其回村各設酒席邀集各房
族長勸令屯聚在寨者皆速行回家安業以免株連其起事情
形及開事匪首亦令開單密呈各紳耆知弭患救危非此不可

皆願遵諭辦理。初六日常備軍董管帶督兵兩隊來康。某前往商辦請權駐紮城內。按兵不動。候諭飭各紳耆先設法購線。另行相機拿辦。初十日江巡道李協統督率大隊駐縣屬鳳崗墟。某先一日下鄉傳集紳耆查問。據稱各寨已遵諭解散。其開事情形及首要各犯亦已查明。惟惴惴焉以片紙密呈不敢明告。及江李大隊到時。傳見各紳耆。諭以辦法。乃各心雄胆壯。愿設法引線拏犯。當在鳳崗時已獲匪十餘名。二十日江李移駐塘江。適因福音教和馬兩教士是日來鳳崗。飭某暫留與兩教士議鳳崗耶蘇教民恤款。某與該教士本係素識。不致刁難。各教民被毀情形。亦已訪查明悉。無復紛岐。遂於二十二日議妥。具

結了案。隨即與兩教士同赴塘江墟。復將塘江教案一律議結。十月初四日。江李以康事略有頭緒。赴上猶崇義查辦。某仍留塘江辦匪。兩教士則另往各村分查教民被害情形。回至塘江與某將邑內該教民恤款次第議定。除該教堂已在贛由江升道議結償大洋二千二百三十九元外。其教民被毀者共六十三家。死難者九人。一并償大洋一萬三千零三元。立約完案。其款當由縣內之賓興局墊付。此某抵任初隨江升道李協統在鳳崗塘江辦匪及議結福音教案之實在情形也。顧福音教案之議結。僅教案中一部分耳。南康開教以天主教為起點。而戕教士戮教民亦以天主教之釀禍為最大。奉憲台特派俞道駐

贛專辦教案、與贛縣張令議定該縣教案後、復調某至贛與徐金兩教士開議康案、該教士素敬服江升道、與某亦誠信相孚、某抵贛初聞兩教士要素甚巨、教堂索賠銀十四萬兩、教民索賠洋二十六萬元、某私告以爾浮開此數、實使我爲難、若要我與議須以實數相告、該教士當告以教堂賠銀十萬兩、教民賠洋十六萬元、此係實數更無可減、某遂將此情稟知俞道、適贛縣張令亦在坐、俞道以張令曾與兩教士議結贛縣教案、請爲帮忙、再往與兩教士商訂、詎兩教士對張令言、教堂教民賠款各加派一萬數、俞道駭然、詰某原數是否有誤、某告以確無有誤、俞道遂將此數電稟憲台、及撫憲、并飭某專議此案、某當以

其數太巨、須再與議減、俞道告以議減則可、惟不可與開翻、張令前議贛案曾與開翻、致多波折而數目又有加無減、實爲吃虧、某謂不敢開翻、但此數亦不敢承認、初六日某往與磋商、告以向來賠款專責成地方官攤派、我一窮如洗、敝縣今年兵差來往不絕、賠墊已巨、若再攤派教案、何以當此、鄙意須教堂教民各再減半、方可議結、兩教士當堅執不允、後某於兩案各議加五千、彼等亦各議減五千、某意既已可減、即可漫乞磋商、次日往與接洽、又加五數、彼等亦各再減五數、某以縣獄押犯甚多、時虞出事、急欲議結、該教士則故示委蛇、并謂中國人議案皆多方延緩、以示萬難、再減、爾何必過急、某告以一身兼顧、非

專事議案者可比爾須諒我該教士亦以爲然再後乃議定教堂償贛銀七萬兩教民賠洋九萬二千元訂立草合同合同立後該教士又謂爾因兵差賠累當是實情向來議教案每於賠款外加一五折或二折爲中間人分潤我等願酌量外加若干概讓與爾以彌補賠累某聞此知教士有意分潤卽告以我爲地方官賠累分所應爾惟爾等格外帮忙我須稟知俞道明提若干數酌勞若私自外加以爲分潤我不爲也該教士默然遲遲乃謂我等最佩服江大人清正爾亦江大人賞識之人此次我與爾皆做一清公事不外加一文某乃對之作揖稱謝遂立正合同定案俞道聞之深以爲喜十八日稟請署巡道王提撥

鹽捐項下款折七三洋壹萬五千四百五十九元零某再將所籌匪欸湊足二萬元正付清第一期票欸回康後南康堂內安教士又以被害教民需款甚急原約本議定賠款付該堂領取商請某就康再籌付壹萬元其時贛興局已無款可墊無可籌措十二月初六日江升道適再來康籌辦清鄉等事乃就近稟商遵前撫憲諭於地丁項下撥付大洋一萬元正後另稟請駐贛官銀號墊付七二洋二萬元贛銀一萬四千兩由是第一第二兩期票共七三洋五萬貳千元贛銀一萬四千兩皆付清取回票據存案此某隨俞道議結天主教并籌付第一二期償款之實在情形也教案既結則開教之匪犯急宜分別懲辦某在

黃巖日上海軍日家譜 卷三
塘江時由各兵勇拿獲及各紳士緝送者共六十餘犯當以在鄉押犯過多諸多不便特將供認各犯共四十一名陸續解道審定餘犯解回縣禁押某回縣後再將城內由紳緝送各犯詳細研究其時城內押犯亦五十餘名一一訊定復將供認各犯十三名開供稟請本道核辦其餘三四等犯俱照前撫憲所定四等辦法發落繼因贛縣監獄擁擠不開奉本道札示仍押回縣監除最重要犯七名由道詳請歸奏案辦理奏定正法餘分別輕重監禁自是匪案皆以次清理而各教士亦無復違言此某辦理開教匪犯之實在情形也江升道駐康時奉到前撫憲諭江教士案已與柏主教議定於南康老教堂旁側代購三丈

寬六尺長之地構一小經堂立碑於其內購地立碑共洋三千元江教士葬地聽教堂自理惟地須官購等因江升道奉此飭某與安教士面議安教士乃云徐教士轉柏主教來示立碑造堂共洋三千元購地不在內某查地係謝姓管業謝姓兄弟人多不欲賣與教堂某不得已飭紳士從中調停并飭局紳代購此地議定地價壹佰零六元由某捐廉過付另與教士商定構堂之地由縣購送以敦睦誼葬地則由伊自購不煩及地方官以昭平允彼此和衷議結其牌文則由某擬稿送交當因有人於字句間從旁挑剔至本年三月間某赴贛面與徐教士磋商始就範圍皆已通稟在案此某遵諭辦理江教士造堂立牌之

實在情形也。鬧教之匪犯既辦，則教民之狐假虎威，從中購禍者，亦應分別懲辦，以防生事。查教民中之最不安分者，王揚鴻、陳周、陳啓英三人。康民所最側目者也。某查悉，即與徐安教士面議，請將三人革出，以憑核辦。已經答應，詎該教士民以護符已失，運動信豐吉安各教士來函說情。徐安教士亦情不能卻，謂該教民累世奉教，不便遽革。只要有人控告貴縣，即可拿辦。我等必不包庇云云。奈紳民以未經革出，仍畏之如虎。雖招告亦不敢告，惟由某查得陳周訛謝姓洋六百元，已付過二百六十元，告知安教士，隨將二百六十元繳案。未付者不許再索。安教士并飭各教民等，若再多事，皆由爾父母官拏辦。我不與聞。

自是王陳等皆遠避外縣，其餘教民亦斂迹，不敢出頭。數月來，遂無復民教案件。庚子鬧教案卷內有監禁嚴姓二犯，久已期滿。某面稟俞道，請札飭釋放。奉札後，某傳該房族來案，具保安教士聞知，來言他事俱由貴縣作主。惟此犯江教士有約在先，不宜遽放。某折以該犯禁期已滿，即照貴國例期滿之犯，無再過惡，亦應釋放。況嚴犯已奉文釋放，敝縣何敢再禁該教士。無辭可答，但云須令來堂賠禮。某告以該犯之子僅十五歲，教堂內開單亦說伊鬧教在場，殊非實在。賠禮無不可，惟伊子尚幼，當令帶來請貴教士看過以後，不再牽入。該教士亦答應。此某查辦教民及清理教民積案之實在情形也。此次康案償款為

黃巖田上海五日家書 卷三 三
爲數甚鉅江升道以向來教案每歸地方官均攤滋事匪徒轉
得脫然無累巨案因而迭出殊非甚後懲前之計各教士亦深
以爲然江升道駐康時因設法籌款先將鬧事之匪分別提產
充公不足則酌罰賭棍又不足則辦賑捐以補之派營哨官會
同辦理自去冬至今約籌至十三萬餘元現因各款皆已辦竣
某又稟請江升道凡本係罰款其情罪較輕者酌予改捐以示
寬大江升道亦皆允准大約捐款當得八成罰款僅二成是以
鄉民亦皆願繳三月內已收至七萬餘元其款皆由賓興局紳
收存惟收時須開一收單送縣備查付時由縣署開一付單交
局核辦現將此款提付第三期償款贛銀壹萬四千兩七三洋

四萬元江教士造堂立碑洋三千元取回期票存案此後尙須
付夏秋冬三期教堂償款共贛銀四萬二千兩將未收之款陸
續收付已足敷數現安教士已往大窩裡購造新堂去時與約
定貴教士在鄉聞有謠言卽函告我我有聞亦卽函告可以預
先防護每接函皆云地方皆已安靜此某籌付各款及現在民
教相安之實在情形也教案旣理則辦理善後乃其要事善後
之事以辦警察興學堂爲大宗南康警察向止四名有名無實
鬧教時楊革令招團勇百四十名皆係烏合某擇其精壯者三
十人充當警兵籌足經費嚴加操練日夜梭巡站街餘皆裁汰
各鄉則因經費難籌遵江升道班發保甲族禁章程次第舉行

俾各鄉各保各自查辦清造戶口冊送核匪類無所容身地方漸以安謐南康學堂向共十餘所城內只高等小學堂一所學生四十名某與各紳商定城內添設中學堂一所學生三十名速成師範學堂一所學生三十名皆已於二月間開學鄉間亦辦兩等學堂百餘所已陸續開報某以學堂加設而無教育會勸學所各員時常調查仍恐有名無實因又督紳開辦先由某捐廉一百千以爲提倡當俟一切彙齊再行通稟立案此某開辦警察及學堂之實在情形也以上各節皆某責無旁貸現雖奉調臨川行將去任而矢慎矢勤昕夕無暇仍不敢存五日京兆之心致負委任因憲台加意塵注用敢瑣述呈是否有當

尙祈訓示祇遵

稟覆景德鎮瓷工鬧派酌籌先時勸解辦法

敬稟者竊某前以景德鎮警費抽自鋪捐稟乞暫免加抽奉憲批仰巡警道酌核准暫免抽解并奉批示以瓷工鬧派懸習相沿已久應如何先時勸解俾工界勿爭意氣求勤工作卽速連絡紳商一籌及之等因某竊維商界之發達專視工界爲轉移工界之紛爭易致商業之停滯泰西各國其工人優勝者類由學堂出身具有文明思想而罷工盟誓阻礙商機見之繙繹各書者猶滔也皆是矧景德鎮工人出自下等社會國家教育彼皆未有聞知每年三四月間鬪集一二十萬人相率來鎮無身家

無妻子并無真名實姓蠢如鹿豕悍若豺狼其勢本戾也不可終日而又有素來開派之野工無所執業專以鬧事謀生者爲之作俚謂某行色宜爭某工價宜加工人因有利可圖遂一唱百和停工起事刀矛迭出街巷皆盈地方官以人眾勢猛恐嚴加彈壓禍將及身竟聽其自開自止是以開派一起每致累月不休歷年來毆官傷兵習爲故事亦已更僕難數矣其尤可惡者被戕之人除相抵外始行報官官有拘押勒令先事釋放且任其乘轎鳴鞭而出乃許止鬪積弊既久毫不爲奇某到任時訪悉前情日與公正紳商籌議有治標之法一有治本之法一有旁治而爲標本之法一治標之法某已行之仰仗憲威今年

幸未出事其餘則非旦夕所可奏功尙覺有志未逮謹爲憲台詳陳之治標之法首在密與嚴密則消息靈通先事預防不致臨時失措嚴則威聲震懾莫敢玩視不致任意輕嘗某抵任初風潮百出工界已紛如亂絲舍治標別無良法其下手之方先在訪悉三十餘名野工懸賞緝拿并出示謂奉憲嚴辦敢滋事者卽行正法雖當時拏到僅三人而震以雷霆之威已足戢其野蠻之氣不數日野工之煽事者紛如鳥獸散矣野工雖散其遺孽所留或遇機觸發架工爭工之事猶日有所聞某訪知實情不避兇險親自往拏其拏到者痛加懲責并與各密首定約非已開工息事四五日不准保釋七時不准乘驕鳴鞭違者

仍挈辦該鎮工人以在公司中者尤爲恣肆向不受地方官拘押四月間該公司工人因事私拘各坯工挈案後某一律懲辦該公司人眾環視叫囂毫不爲動持之既久不復敢肆而各工人氣燄爲之一阻顧該鎮人工太裸往往咄嗟之間聚至千百前沈內翰亮榮到鎮開天足會演說某等皆同到當時工人觀者如堵牆亦頗靜鎮不謂散會回署尙未釋衣而該工人一闕而入將該會器物打毀勢將逞兇沈內翰飛書相告某立即親往手挈滋事者就地懲辦該會紳士以人太眾辨太急恐激出事端某不願辦畢令警兵押犯回署再親將外觀諸人盡數轟散始自折回而各工人之氣燄又爲之一戢最後小器幫與四

大器幫口角夜二更發信次早卽各出軍器宰猪祭矛四小器幫該鎮行色中之最兇橫者也某聞知卽親赴該會館立傳各紳同往勒繳刀矛隨後防營巡警亦到先同至小器廠該工人抗不肯繳紳士工頭請先回署隨後悉數送繳某對之設誓謂今日不繳決不回署堅持片時該工人忽羣然發喊其勢汹汹當請防警督兵整隊以向之該工人乃漸懼而散某遂合同警員挨廠搜繳共繳到刀矛二百餘桿紳士工頭皆云已無復存因令各出具切結此後若有刀矛出街惟伊等是問再折至大器廠依法辦理亦繳到百數十桿早晨出去夜靜始回自此之後各工人皆謂今年派鬪必開不成凡有爭執均請商會平

黃巖田上海毛日家譜 卷二
議或求官判斷風氣漸變各工人之氣燄更爲之一衰統計今年各行色停工者皆隨停隨開刀矛始終未上街亦未有殺人巨案此急則治標之法其所已經籌辦者也然治標僅顧目前非治本終難善後景鎮工人約一二十萬無管束法無駕御法任其狂妄自由莫知紀極夫以一二十萬軍營駐紮一處有官弁爲節制有軍法爲防閑猶或時至鬧事况該工人之漫無彈壓也某曾與紳商籌議於工頭中公舉明白公正者四五人高其聲價立一公所俾可與官紳各界直接議事以疏其憤鬱不平之情復多舉散工頭爲之分出行色層層聯絡卽以層層約束每窰每廠賃用工人若干必查真名實姓據數造冊呈送工

所有不法者卽可按圖索驥緣景鎮窰戶多薄待工人工人積不能平於是各種派鬪而未鬪之前旣鬪之後力又不能與窰戶抗於是隱其真名姓而僅以綽號相稱至僅以綽號相稱而鬪派之禍乃愈急矣遽使之出真名姓以造冊工人必不從也當先設白話報分派各工廠將所以維持工業使工人窰戶兩得其平者委曲開導又將景鎮磁業漸不如前若各仍舊習不思逐漸改良則江河日下工人窰戶必致兩敗俱傷愷切言之庶幾工人窰戶皆知猛省而磁業當漸有轉機查景鎮每年磁器進款向有六百萬之多實中國最大之工廠也近來連年派鬪買客定貨每至逾期而派鬪一次工價又高一次以是買

客裹足、每年生意竟減至一百餘萬、窰戶漸以虧歇、窰戶虧歇而坯工乃愈無謀食之方、以中國最大工界、竟任日就衰替、不爲設法挽回、不惟可惜、抑亦貽笑外人、而挽回之法、某與紳商籌議、僅見及此、又因在任僅數閱月、諸事繇冗、日不暇給、而各紳如汪龍光、吳簡廷輩、復皆進省、不克合力舉行、殊深歉仄、此則治本之法、某雖籌及之、而未克成辦者也、至旁治而爲標本兼治者、則整頓巡警、習藝所、及嚴禁行色賭、又爲一大關鍵、今年各省偏災迭告、磁業減色、失業工人、大都流爲盜竊、十月間近鎮各案、卽已屢出、自冬月初、教練所學生、已兩班畢業、共百二十名、日間分班站崗、夜間檢巡、達旦破案了事、日有報告、無

業游民無所留足、遂皆逃出境外、市面較已安謐、習藝所收留光棍、教習工藝、其向爲工人者、卽令各執本業、俾可改過自新、亦已漸有頭緒、若二者果能辦成、其關於工人影響者、亦自不少、惟行色賭一事、其爲害工業、又一大宗、向來工人得錢、出工廠卽入賭廠、各曰行色賭、而除正印官與警察外、各有規費、禁之亦頗不易、蓋衙門內外、旣皆受費、官出拿賭、信息早通、必不能掣到、而不爲實行禁止、則工人費皆爲賭費、窮無復之設法、鬪派乘機盜竊、仍將因之而起、雖多方補救、終無以善其後也、某與商會定議、合紳商學界相與合力、指拏官耳目所不及者、紳商爲助之、或不至有名無實、惟欲實禁者半、不欲實禁者亦

半將來能否收效，尙不敢必。此則旁治而實爲標本兼治者。某雖籌辦及之而未敢遽以自信者也。某一介迂儒，才疎識淺，仰承恩遇，委權斯邑，而籌議所及，尙多未及實行，殊呼負負。惟念愚人千慮，尙有一得，則往者雖已莫挽，而來者或尙可追。謹承明問，用敢實陳，是否有當，尙希訓示，祇遵。

朱太親母趙太宜人八旬壽序

庚申之秋，余季壻朱曉楠自滬返里，走告余曰：今歲十月二日爲大母趙太宜人八旬設幌之辰，屆時儼舉行家宴禮，敢乞爲文以侑余憶。曩者歲在庚戌，太宜人壽屆古稀，曉楠尊人似蘭司馬方有聲於滬，匕上聞人與似蘭有舊者，皆隨戚屬後登堂。

介壽余適縮符浮梁，不獲躬親，其盛儼俟。異時補祝，乃不數月似蘭竟歸道山，又不數月武昌事起，余自彭澤解組歸杜門不出，而補祝之事遂不果。今者太宜人壽躋八秩，余其可以不文辭耶？余故居與似蘭家相去七十餘里，太宜人近三十年又就教在滬，相去益遠，故余於太宜人事不甚悉，然亦嘗聞其略矣。太宜人身世所遭，凶悔吝居三，而吉居其一年，二十歸贈公少卿先生，兩家皆儒素也。未踰年，卽遭洪楊之亂，隨其姑孫太孺人避地鄉間，閱歲始返家室，蕩然太宜人相夫奉姑，力持門戶，歷數載始復舊觀。而少卿先生乃旋卽謝世，時太宜人年四十餘，似蘭甫八歲，孫太孺人已七十有二，未幾又棄養喪亂之後。

後昔日鄉里宗族大都少者壯壯者老者衰其子弟有游滬歸來談及太宜人康強猶昔并述其加惠鄉人無微不至想望丰采者咸急欲一見爲快倘由此惠然言旋偕二三親故暢談一生因困得亨之由使各歸告家人而知所興感則旣可以激勸里黨復可以娛桑榆晚景而彌永其年視滬上之風塵襍選莫可告語者當更親切有味也太宜人其亦有意乎

王冀階先生六十贈序

冀階余內弟也今歲九月四日爲冀階六旬初度之辰戚友謀爲舉觴稱慶間序於余冀階聞之曰余何慶哉余少孤未能自立稍長母命就學以病癘之擾或作或輟雖附身庠序於學概

未有得也歲戊戌先母棄養越數載仲弟曰釗又不幸早世弟婦梁隨亦染疾身亡遺一子一女僅數歲余以是故幽憂更甚病勢益增日惟坐斗室中與藥爐茶灶爲緣孤栖獨宿者幾二十年此二十年中一切家事皆由內人主持有子女四人職業婚嫁亦不甚過問蓋幾爲病廢人矣今雖就漸暢適而行年六十悠悠忽忽於家國兩無所補是程子之所謂蠹也復何慶哉復何慶哉余曰子言誠然雖然疾也者孔子之所慎也孟武伯問孝孔子告以父母惟其疾之憂是疾又爲人子者之所宜致意也子秉質較弱而能保身慎疾以自永其年或亦孔子之所許乎余少時清癯瘦削朋輩中謂余無壽者相恐難永年余弟

叔鼎視余尤甚予與叔鼎略相等余每引以爲憂視年少氣盛壯佼過人者恆若望塵不及不謂曾幾何時而少壯之爲所欲爲忽焉沒焉者不知凡幾而吾三人乃老而尙存也殆亦能慎疾與不能慎疾有以致之歟彼夫才俊之士離父母違妻子干祿於數千里外當其毅然遠出意氣自豪將謂顯親揚名爲宗族交遊光寵直指顧問事而其究也君門萬里宦海多波僥得僥失有以窮以措以疾病死亡而婦子家人不能相顧者其視子之妻賢子孝孫支繞鄰晚景堪娛相去爲何如耶大抵人之秉盾強而不自愛惜則強轉足速亡弱而知自保養則弱亦堪持久如行舟然舟雖固而日震撼於驚濤駭浪中有旋焉相沒

者矣舟雖不固而惟偃傍於溪流湖沼內有歷久仍存者矣人之養生傷生大略類是子雖未有爲於世而家庭之樂自在古之人有著養生篇以諷世者子試取而讀之當亦釋然於心而又何憾焉莫階曰聞子言於吾心不無戚也子其書此以贈余將借以自勉倘亦終此餘年之一助乎余曰子旣勉此余將并告吾叔鼎令其亦以此自勉也于是遂爲之序

狄廣文桂舟先生八秩榮慶序

民國肇造修正褒揚條例定爲八款曰孝行純篤曰特著篤行曰盡心公益曰有功藝術曰碩德淑行曰睦嫻任卹曰節烈婦女曰年登百歲凡有合於各款之一者由內務部呈請褒揚蓋

所以勵風俗敦教化使聞者咸知興感法至良意至美也溫嶺
狄廣文桂舟先生其生平行誼合於褒揚條例者計凡有三地
方有司彙其事實備文報部褒揚行有日矣親戚故舊以廣文
年躋八秩而又榮膺大典咸爲文紀盛以爲舉觴稱慶之侑余
與廣文誼屬同門不可以無言廣文爲陳師莘農高足弟子陳
師後爲吾鄉南渠山長余幼時亦曾從之游屢聞師稱道廣文
之賢繼余於歲試鄉試時遇廣文得與訂交廣文輒與余言師
待遇之厚有民生於三事之如一之意余因是心佩廣文者不
置然隔一二歲始一遇也亦僅數夕晨猶未盡悉其爲人也嗣
後余作宦江西羈於職務者十餘年與廣文遂不通音問歲辛

亥余解組回里家居不出儼至溫嶺與廣文圖一良晤而吾邑
適辦清丈鄉父老囑余任其事卒卒無須臾閒又不果行杜詩
云人生不相見動如參與商信哉信哉茲者友人以廣文請
獎事實冊見示余受而閱之覺其條舉各節若疏濬金清一帶
水利分修下水洞一帶城垣以及辦團興學改造獄室諸事與
褒揚條例之第三款合其整理闔邑義倉以備凶荒經理宗族
義公以濟困乏同治宣統年間舉辦賑濟待以舉火者千數百
家與褒揚條例之第六款合至其游學武林時所得獎金概爲
陳師置田宅陳師病躬侍湯藥衣不解帶者數月卒後又爲營
葬盡禮則與褒揚條例之第二款又合余於是自返而滋愧矣

黃巖田一海亭上家譜 卷三
余昔在贛時署理縣事者共有五屬僅於臨川任內幸邀嘉獎
餘皆無治績可言其視廣文之功在桑梓渥荷褒榮者相去爲
何如耶余任辦闔邑清丈已閱五載訖未告成心嘗抱疚其視
廣文之辦理要務井井有條旋卽蒞事者相去又何如耶余學
於陳師闊別後卽不復過問師弟之際如秦越然其視廣文之
事存事亡禮無不盡者相去更何如耶余浮沉一世而生平事
業無一可告廣文余於廣文復何言哉雖然余縱無可與廣文
言而廣文之行實皆足勵世勉俗實爲余心所深折余聞廣文
文孫化異於月之吉日行合巹禮屬在戚好將因是登堂介壽
以博老人歡而其時褒揚盛典計已下賁國恩家慶萃於一門

榮啟期三樂不能彷彿於萬一矣又烏可以無言是爲序

六十後自述

余幼時賦性柔懦。無志無識。生黃巖溪萬山中。又無良師友以
資教益。恒慢自娛。與世浮沈。今年忽忽六十有二矣。學問事功
兩無表見。來日苦短。終焉而已。夫復何言。顧念我所經歷雖不
足與外人道。而我之子若孫。其無志無識。大略與我等。我之所
失未嘗不可援以自警。我之千慮一得亦或可藉以取裁。且我
日薄桑榆。倘忽焉溘逝。無一字垂後。我之孫子曾不知我爲何
許人。亦將引以爲憾。是故姑自述一二以遺我後人。可存與否
在所不計。惟緣飾自欺則所深戒云爾。

余七歲始就學。十六歲出應童子試。二十歲與兄梅友同入邑庠。二十三歲余食廩餼。其時吾家中落。負債纍纍。家君與人合夥開潭頭竹行。梅兄輟學就之。余則課徒為業。兼督率弟輩讀書。間或至郡城省城三書院肄業。修脯所入。獎例所得。年終彙以奉堂上。不敢一毫自私。時余已有子女數人。衣履不備。室人或以為言。余不之顧。蓋余自入學以來。其他學問概未有得。惟父母在不存私財一語知之頗真。行之頗力。尚可以告我後人也。光緒十五年。余鄉大水。余與陳禹卿戴雪門到處募捐。并請府尊陳撥米百餘石。辦理平糶。民食無虧。雖成事因人。而於鄉里不無小補焉。辛卯友人王玫伯薦余入福建學使沈叔眉侍

郎幕。侍郎湛深宋學。身體力行。其踐履之篤。為余生平所未見。玫伯淹貫漢宋。具有淵源。日與之處。得聞律身行己之道。頗思自立。不幸次年侍郎遽歸道山。廢然而反。旋又墮落如故。隨後玫伯纂修郡志。延余任分纂。畧知砥礪。然為貧所驅。稍暇仍從志考課。衣食之計多。而身心之益少。歲丁酉。余以拔萃貢成均。旅食京華。未有寸進。反而以課徒為事。未幾清廷廢八股。停考試。老學究伎倆無所復施。益以窮困。庚子。先母棄養。服闋。乃以直州判就職江西。冀分升斗之祿。時江訥吾廉訪方守南昌。王太常弢夫先生薦余任文牘。廉訪宦江十餘年。殫心任事。勞瘁不辭。有江青天之稱。親炙久之。沅瀿一氣。次年春考入課吏館。

頗爲大吏所識拔。委洋務局文案差。未到差而廉訪已昇調贛南道。余以夙蒙青睞。可資歷練。辭文案差。分道赴贛。抵贛後。廉訪委辦東關稅務差。任事數月。贛州府查蔭階太守又委辦贛州警察。余以稅務素所未諳。乃辭去。旋分道李太守又委鹽卡查票事。查票無銀錢經手。事簡易爲兼之而未辭也。未幾贛州中學校教習因事回去。查太守又委兼任。乃辭去警務。時廉訪以贛南甯三府與福建廣東爲界。會匪充斥。此拿彼竄。大爲地方之害。特分巡各處。辦理清鄉。閱半載尙未就緒。隨調余爲隨員。襄辦一切。因復辭學堂差。蓋贛屬龍定與涑頭各處交界。皆匪窟也。明王陽明撫贛。剿撫兼施。漸就平復。近遺孽復萌。非合

西平已

閩廣兵力不能肅清。故不得不多稽時日。余隨廉訪辦理稿案。兼與地方官審問匪供。計在外七閱月。事竣回贛。時已夏杪矣。未匝旬而安吉府以開糧釀成巨案。府尊徐又稟請廉訪蒞吉辦理。省電照準。廉訪仍帶余同去。抵吉則鬧事要犯已獲到數名。府尊先提審某犯。請廉訪派余幫審。某犯著名之衙蠹也。審問時。余以府尊親訊。不便喧賓奪主。僅幫問一二語。該犯狡展異常。遲至三四句鐘。尙無確供。府尊忽稱有事入內。延不復出。余乃細加駁詰。該犯長跪已久。力不能支。遂一一供認。供認後。府尊出邀晚餐。謂該犯才狡殊甚。後竟供認不諱。吾在簾後靜聽。聽爾逐條詳詰。無復翻異。遂不再出。以後各犯擬請爾與廬

陵歐陽令同訊。余實無訊。鞠才云云。已而各犯均已供認。惟有一犯年已七十。自認各供實係首犯。心爲戚然。廉訪後將此案詳情稟請撫憲核辦。余等無所事事。一日府尊來商廉訪。以該屬永新縣須委代理。儼請余承乏。廉訪謂渠係貧儒。如不至賠墊。此處無事。不妨令往。府尊去。隨以告予。予無所可否。數月後。府尊送來委札。只得權往。未及兩月。正任已到。交卸回贛。約虧累三百餘金。至贛途遇相識。向余道賀。余問何事。則云省電到。委君署瑞金縣。余不知虛實。姑置之。至道署謁廉訪。亦言及此。并云吾爲爾喜。吾卻有所不便。詢其故。則曰吾即將出巡。甯屬爾去後。吾無人幫助。余曰何妨再隨去。遲數月赴瑞。同是

辦公。奚分彼此。廉訪謂尊人已年邁。亦欲望爾得缺。何可以我事誤爾。談小許辭出。因思瑞金之委從何而來。豈徐府尊以代永未二月致有賠墊。而爲余說項耶。抑前查太尊升調過省。而爲余轉求耶。憶查太尊前委信豐代理。心中已定某令。往商廉訪。乃不說明。廉訪謂無人可委。則令毛某去。查回署頗悶悶。邀余面商。曰信豐須委代理。爾肯去則請爾去。不去則令某令去。余曰余不願去。查問何故。余曰聞某令欲圖此缺。余不願攬人所圖。查曰廉訪若問爾。爾不好說明。祇說恐要賠墊不去。余曰廉訪必不問余。倘若問及。當以此對。查曰予此後當另爲爾設法。予曰感極。瑞金之委未知所由。故兼疑及此。然此係四月事。

黃巖田上海毛氏家譜 卷三
而予七月乃得永新代理缺。亦可見凡事皆有前定。可不必強求也。予是時在贛無事。擬料理赴瑞金任。再謁廉訪詢隨員是否擇定。廉訪謂有某令知醫。求充隨員。吾多病本無不可。該令忽謂有妻小兩房。一房在某處。欲接來同住。苦無差使。如蒙派遣回來。當可辦到。吾聞之。卽謂吾出去皆係自費。毛某隨予出去。其餽費爲吾所給。並不向地方官支取一文。人人共知。爾可詢問。吾初出巡本無隨員。今亦無須勞爾。遂辭之。予曰。旣如此。則予仍請從。廉訪曰。爾現系藩憲委任之員。如果肯去。吾須移文咨調。予允之。不一月。藩憲文來准調。遂又隨至甯屬。至次年八月方辦畢回贛。適贛縣愚民聚眾鬧教。打毀教堂三所。予偶

丙午

過此。見愚民熙熙攘攘。從教堂後門入。搬去物件。贛州道府縣及提督均在前門一公所內坐定。愚民出入後門。若不知有官。官亦若不知有後門搬運者。深以爲駭。時廉訪已奉旨陳臬江西。交卸道篆。無復官守。故不與往。遲一二日。信豐等縣亦有鬧教消息。廉訪請道憲王委余及其管帶馳往解散。至則信豐尙未發動。零都已有一二十人滋事。拘拿爲首一二人。遂無事。回贛消差僅十餘日耳。而南康又復大鬧。焚毀教堂七所。折毀教民房屋四五百所。戕江教士一名。余聞之深歎愚民無知。然亦未甚介意。次早廉訪忽差人來請。并謂道府縣均在江大人處。請速往。余聞而疑之。及至。廉訪謂余曰。南康教案鬧到如此地步。

黃巖日上海手記 卷三
楊令形同木偶。應卽撤任候辦。各位擬請爾接任。已電達藩憲。爾卽設法前往。不得遲延。余曰南康糜爛至此。余無才無識。何能勝任。請另委人。廉訪忽作色曰。大家公推及爾。爾不往。我必不答應。余曰南康事須老吏方能辦理。余初學步。恐至僨事。且余孑然一身。內無幕友。外無兵丁。手復無一文錢。如何可往。廉訪顧顧縣張令曰。幕友請爾分一個。兵丁我巡防隊聽調。無錢則城內有兩錢鋪由我擔保。爾可去支借。余無辭可卻。祇得默也辭出。至晚忽聞藩憲回電。着正任程令去。毛令另有位置。余乃如釋重負。所謂無事一身輕者此也。是夕同年友周大令邀客。內有予名。他客多辭不到。予以脫却南康事頗自愉快。獨去

赴席。主賓共四人耳。食罷談至更闌。回廡酣睡。天曉未起。忽傳江廉訪又差人來請。心爲一驚。不得已披衣往。則道府縣先在。廉訪持電文授余。謂撫憲仍飭爾往。程令另有位置。爾卽速照昨日所言設法到任。幕友兵丁錢鋪均已代爲措置矣。於是余無可復辭。遂於九月初三日偕張弁率兵赴任。所有到任辦理情形均詳稟兩江端督稿中。不再及。惟議福音天主教案。有爲公牘所不便言者。姑附詳之。一爲與和馬兩教士在鳳崗議福音教案事。該教士前在江臥雲處晤面數次。已屬相識。議定後。余謂款已定議。必須有憑據存案。該教士請余酌。余謂吾國人民結案兩造必俱在官廳具結。今兩造人多不便齊集。請以

紳代民。以貴教士代教民具結。該教士初囁嚅不言。既而答應。遂均具結畫押。隨接議塘江教案。議已妥該教士函告江臥雲。謂教士與中國議案。向惟訂合同。無在縣主前具給者。吾等在鳳崗議案。因毛縣主請均具結。情不能卻。姑且曲從。然爲向章所無。於余等面子亦有碍。請爲轉達以後仍立合同具案。臥雲將原函寄示。請勿強人所難。余閱之發噓。謂外國教士視中國官吏如無物。今乃曲從我耶。然感該教士誠意。塘江案遂與訂立合同。此一事也。繼乃與天主教士議全縣天主教案。余抵贛。初聞該教堂索賠款十四萬兩。教民索賠款二十六萬元。頗覺爲難。後迭次磋商。議定教堂賠贖銀七萬兩。教民償洋九萬二

千元。定議後該教士往告江臥雲。以南康教案較贖案格外從減。實爲毛縣主至誠所感。惟向來議教案者有八五折或九折抽頭。於立合同時照數外加。此次毛公賠累頗巨。擬以是爲彌補。請君與渠言之。臥雲以告。余謂此必伊等欲分潤。現合同尙未立。若概拒絕。恐更生支節。我意與上游言明。另撥若干數爲二教士酌勞。余則一文不要。請君轉與教士言之。越日臥雲以余言告教士。謂伊等並不要酌勞也。臥雲又以告。余以教士意未決絕。再往晤談。仍以酌勞爲言。教士仍以外加爲言。余謂外加之議決不可行。此次賠款合計約近二十萬元。向來開教議賠其款多向本地捐派。若再外加又須添二三萬元。以二三萬

元從本地措置破家蕩產必多數百戶。取數百戶破家蕩產之錢爲我等分潤。是造孽也。我雖賄累。他日或可望彌補。決不敢造孽以貽禍子孫。貴教士傳教勸人爲善。更何忍要此造孽錢。該教士默然。久之。乃曰。我等最佩服江大人清正。公亦江大人賞識之人。此次我與公皆做一清公事。不外加一文。亦不要酬勞。余乃對之作揖稱謝。遂與訂立合同。此又一事也。余憶康案審定後。共嚴辦首犯七人。合前從江廉訪在贛甯各屬辦匪正法者約一百餘人。此等罪犯雖多罪大惡極。然安知無一二人負屈。孟子云。殺一不辜而得天下不爲。我爲一縣令而爲此乎。念至此。遂終夜傍徨而不能已。我子孫苟有出仕者。我願其毋

丁未
甲申

爲此也。我在南康年餘。調任至臨川。臨川民風純善。無刑辟事。特請家嚴就養。聊盡人子之心。憶在任時。所辦理者。惟興學校。修文廟。清積案。禁煙賭。數端。文廟之修。余有序文一篇。已言及煙賭之禁。則飭各紳立禁烟賭會。實心奉行。以輔官廳之不及。每次查辦。由官派兵差二人。紳亦派會員二人。蓋紳士與鄉民情意易通。而兼可防兵差之滋擾。故並行而不背也。全縣均已遵辦。突有一鄉聚眾抗拒。毆打兵差。該兵受傷頗重。各紳請會營往拿。余曰。鄉愚無知。旣已聚眾。驟以營往。易致激變。君等如與該鄉紳耆有熟識者。請曉以利害。將爲首者送縣薄懲。但得該兵不死。余不深求也。月餘。該兵已愈。各犯隨行開釋。烟賭之

禁亦無不確遵。大凡愚民聚眾抗官，皆由小年輕躁任意妄爲。事後經有識者指摘，未嘗不悔懼循生。激之則聚而生變，緩之則散而就範。此一定之理也。是年馮撫憲年終甄別，稱余實心辦事，諳練老成，幸得奉旨加獎。旋又調任浮梁。浮邑有景德鎮者，最難治。未赴任前，知友來告景德鎮開派毆官，習爲常事，非嚴辦不爲功。余聞之，到任後特大張告示，謂奉憲諭景德開派惡習迭禁不悛，嗣後有再犯此者，審定後卽就地正法。該坯工見此告示，不敢輕易嘗試。偶有觸發，余卽嚴加彈壓。故始終未開成派鬪。其詳情已具稟復景鎮。資工開派辦法內，惟審定資器公司工人一案，原稟中未備及。姑復言之。資器公司者，各官

達所結合而成者也。其大服東爲瑞星帥，歷任藩臬督撫。其總理亦係京窳。故該公司工人藐視官吏，漁肉各坯，工恬不爲怪。余到任初，有控公司工人者。余卽派差傳案。傳到時，原告未到。無從審問。而該公司總理稱該工人爲公司中要工，請先交還做工。俟原告到卽行送審。余以其言近理，當卽交還。未幾原告來呈，謂該公司工人向來官長不敢傳案。今聞傳到，又被該公司總理邀回。似此何復公道。余閱此，再派差傳審。則稱因有事回家。當卽函知速返云云。余不得已姑俟之。已而該公司協理來署稱該公司工人與某廠工人滋鬧，已將該廠工人帶來請官廳審問。余謂兩造一同送案方可審問。否則無從問起。該協理

不得已遂俱送來。余先問公司工人因何相爭。該工人謂某廠工人冒公司名狎妓。有壞公司名譽。故帶至公司送案。余問爾等狎伎否。曰未也。余曰狎伎在深房曲室。不在街市。爾等不狎妓。彼冒公司名義爾等何由聞之。吾知爾等必與伊等爭妓。伊等不讓。爾等^等勢盛故將他帶來。該工人無辭可對。余曰爾等將他帶來有差票否。曰無也。余曰爾等公司中有監獄收押否。曰無也。余曰爾等狎妓同是犯法。爾公司無差票無監獄。爾等擅行逮捕實爲犯法之尤。應先辦爾等。着卽行杖責。該公司工人觀審者前後皆是。卽譁然曰。我公司中人不能杖責。予赫然怒曰。予依法懲辦。爾等敢滋鬧法堂。是無法也。卽命差役將大門扛

住。一律拏住治罪。該工人見將關門。遂爭先退出。僅拏到二名。於是先將送案工人杖責。各差役向皆深恨公司工人。倚勢強橫。僅債數十已皮破血出。遂各責一百而止。某廠工人亦畧薄懲。偕同收押。自此該公司工人氣酸漸消。各壞工愈知畏法。偶或滋事。警署王伯潛亦每傳案懲責。此一快事也。景德鎮有一同知本不理詞訟。間亦違例收受。有魏某者買妾生子女三人。忽有撫屬魏姓人。指該妾係伊胞妹。指魏某同姓爲婚。藉端索詐。至同知署赴訴。魏某投押已半年餘矣。案仍未結。因另遣人來訴。并附有買妾証據。係某公婢館女^婢。喻姓。江西人口音。魏喻無別。因至涉訟。余傳案先問魏姓。爾胞妹何時賣與魏某。何當

時不告。至生有子女事歷多年。始來呈訴。據稱幼時因亂散失。是否在某公館作婢。不得而知。何時賣與魏姓作妾。亦不得而知。近有族嬭來鎮。偶至某家。認得該妾係某胞妹。恐犯同姓爲婚之罪。故先自首。余曰爾妹尙認爾及爾嬭否。曰事隔多年。已不認得。余曰爾尙認得爾妹否。曰由嬭言之。大略認得。予查魏某買妾証據。係屬喻姓。魏姓人與族嬭串通。指爲魏姓。供詞游移。必係訛詐。若行文各處調查。亂離之後。轉徙無常。又事隔多載。亦必查之。不真。遂不論姓。喻姓魏姓。據禮買妾。不知其姓。則卜之一語。斷定此女仍歸魏某爲妾。并援李中孚與李柏聯姻。李文忠太夫人亦係李姓。以明同姓不宗者尙可爲婚。買妾更可

庚戌

不論閱兩時。案遂了結。此亦一快事也。余在浮年餘。頗覺勞勩。乃具稟告病。省憲批府尊王查覆。王電覆該令政聲頗好。不便聽其引去。請批慰留。前稟遂無効。後再三具稟。乃得脫却。家君亦隨行回里。余回省數日。巡警道張又委辦東城警察。任事半年。予因前保舉過班知縣加同知銜。尙未引見。特請咨赴引。藩憲又委解京餉。警察差權請人代辦。到京月餘。事竣回省。已臘底矣。到各憲署稟到。藩憲傳見。命余不須辦警。中丞將令爾任彭澤。隨要掛牌云云。余謂彭澤聞係賠缺。不敢奉命。藩憲曰此馮中丞意。爾不去。須自向中丞辭之。次日謁中丞。面辭。中丞謂彭澤所賠不多。現該縣急須易人。爾年內卽要去。我在江西。區

區賠累。必能調劑爾也。余不得已部署一切。於次年正月初八赴任。到任後益自砥勵。方以上憲知我爲幸。孰謂辦理粗有頭緒。而是年九月湖北起事。遽遭國變。馮中丞竟以身殉也乎。因是余亦解組回家。不復聞外事。憶余宦江十餘年。仕宦之時。一切自奉。與處館時無異。此余弟侄輩所習見。故回里之時。尚積有三千餘金。益以祖父所遺。約有五千金左右。用雖不足。而食可無缺。我子孫若能自立。凡百食用。皆以儉約出之。當可強勉度日。否則雖多亦奚以爲。此我所欲爲。後人告者也。我家向無譜牒。家君修輯未成。命余續成。方竣事。而邑人議辦清丈。又推予總其事。屬在桑梓。不便固辭。而責重事繁。經費支絀。岌岌不可終日。雖勉強支持。而告成之期。再須一二年許。幸而集事。尙可卸責。否則終爲吾邑之罪人而已。聊附及之。以見任事之難。

吉凶禮約議

吾黃風俗奢靡最甚者莫如婚喪二禮。婚禮之奢。有嫁一女而變賣產業以殉之。其家至無以自存者。吾家素貧。苦無可爲。奢然習俗相沿。恐子孫有稍豫順。遂至蹈其積習。不可不立議。以豫爲防。查黃巖縣志陳公去奢從儉禁約所載各條。若送聘若尺頭若花堂若豎頭若嫁粧十損十擔廿損廿担若分粧及僕役之類。至三節送禮。新婦歸甯。用回花猪牛。新婦坐月及產子。女滿月週年後送酒食與衣飾之屬。皆備極奢靡。沿至於今仍

而未改且又甚焉以官力禁止而不能稍革語曰由儉入奢易由奢入儉難至哉言乎其他若生子後謝神宴客一日之間至戕羊豕鷄鴨等生命數十 先祖鳳池公有言曰生子求其長命而先戕生命數十加以滿月週年之飲讌其數更倍蓰殊非爲小兒惜福之道吾家向來生子必求老壽人舊衣服改而服之以冀小兒之得壽雖其所冀者或未遽得而較富家大族備置綾袖緞匹剪裁任意以爲小兒服飾者頗爲得之近習俗益奢有數歲小兒卽服皮衣者與古人五十衣帛之意更相背馳記達生編有云若要小兒安常帶三分饑與寒吾觀富家幼稚每不若貧賤之子骨幹堅凝風寒不擾蓋卽是故嗚呼孰謂

愛子過甚而反以害之耶是亦爲可反矣 陳公禁約所載喪事又有用鼓樂唱戲飲酒食肉及每七日後有薦七酒食多至五六七席者查近日更有邀朋飲宴相與接送亡靈謂之薦七送七殮時做祭請士紳數十輩職其事謂之徽祭預日具筵相請謂之請執事大都笑談任意跛倚以臨不惟靡費而且非禮殊不知接七送七惟親屬有服者爲宜朋友雖有吊祭送葬之禮祇宜聽其自來不必相請至飲宴喧譁則更非是吾家子孫皆宜引以爲戒也 吾黃喪家大都延僧禮懺追薦亡靈雖屬迷信而習俗相沿賢者不免祇得聽之惟不宜令僧人唱戲喧譁且延僧至家亦屬非是如必須追薦祇好借祠廟庵堂爲之

婦女年輕者概不許往至以紙作屋屋內僕役器具皆備謂之空屋曾子曰事死如事生事亡如事存此意頗為近之不合過費猶可為也今約議數則以示後人俾可遵守

吉禮

吉凶之禮皆當稱家之有無非可以豫限今姑就其可限者限之至於豐穡則仍以家之有無為準

一送定送聘概用花籃至體面者以春羅一擔為限以後二節

送禮準此

聘金多少就家之有無酌定禮物則春羅裏應備者備之緣多備擔數以壯外觀彼此賞風必加倍徒爾靡費無補實用既屬親戚必係相知與其豐禮以壯外觀不如聘金稍加較為實在

一婚嫁吉日一切可循俗例惟洋鼓號頂馬及小隊護送等概不許用

一完姻之夕請伴郎二人伴姑二人亦循俗例但祇請本家親

屬不另請外客一切坐花堂開小飯之陋習皆不許行

司庫司賓事所必需

其餘幫同辦理者不過二三人足矣吾黃請職事凡有人情者皆請之殊可不必且內有分屬尊長亦以職事名之更非所宜

一男家送豎頭尺頭無論豐吝皆以銀洋折之春羅亦可不用
一女家裝奩至多以房內物件為限若家道豐富必欲從豐者可增贈奩田若干一切鋪排門面者可從節省

一婚期後三日新婦家備各種禮物分裝木古時棗栗備脯之遺意不必盡革惟祇宜奉親屬尊長一切僕從人等概不許備
新婦送茶以親屬尊長為限不賞茶錢其餘外客由司茶備送

新婦皆不必送

吾黃陋習嫁女之家雖無常用女僕至嫁時必雇一油滑婦女以為送婆索取女家珍貴茶品一到夫家凡屬外客皆代

新婦送茶以為打秋風之具其賞錢或二角四角六角八角一元不等概歸送婆所有女家虛靡男家無所得而外客又不歡喜甚無謂也今議女家嫁女苟無常

用老婢凡另雇者皆不許
用嫁出娶入一律準是

一三節送禮不可省者以銀洋折送新婚初不便折送以春羅
一擔爲限

一新婦生子女無論坐月滿月週年除略備禮物衣服以應急
需外其欲從豐者亦用銀洋折送以節靡費回花猪牛準此

凶禮

一殮禮 殮時凡應殉各物皆必齊備惟珍貴之物斷不可殉
卽華美衣服亦可從省緣殉物珍美易令宵小生心死者無知
要珍貴何用墨者薄葬不惟崇儉亦有深意存焉自古及今以
厚葬而被盜者比比皆是宜深戒

一祭禮 殮後設祭請宗族親戚有服者五六人穿白執事有

服者無其人則請外客亦以五六爲度拜獻聽祝皆以孝子親
之一切饌食擇取生人可食者以合事死如生之意牲豕可不
用鼓樂尤不可用吾黃俗例斂後開吊卽鳴鑼放炮皂班呵堂
無禮殊甚是宜深戒執事請酒可省則省不可省則請一席班
昨則另購生肉代之以符舊制

一接七送七 接七送七祇以親屬爲之不必請外客蓋親屬
與死者血氣相連間以外客死者有知精神必不相屬若係女
喪則更不便矣親戚薦七祇請備一席以薦亡靈不另邀朋友
有朋友來可以禮之所無謝之不可謝則以茶點相待不設酒

食
一葬禮不葬時惟起柩入壙及祀山神必誠必慎其他所需冥器不可省者略備數件但宜以樸素爲主不宜踵事增華致背於主哀甯戚之義

一點主 點主以孝子自點爲宜孝子不能自點以親屬代之

續修譜牒議

宗澄承嚴命纂修家譜忽已五更寒暑矣自慚謏陋於體例門類皆必幾經參攷始敢付諸手民蓋草創若斯之難也草創既難則續修之事不得不預爲議定王政伯修西橋王氏譜附有續修譜牒議最堪取法特備錄之以告後之續修者

政伯之言曰周時譜學明備上設小史專官掌奠繫世則在下亦必有專掌其事者其時宗法修明一族之譜必掌於宗子蓋宗子有收族之道一族之中凡吉凶喪葬取妻生子承襲立後無不與聞見聞塙而紀載備其故爲譜也詳而覈後世宗法廢而譜學湮或數十年而一修或百年而一修平日既無紀錄臨時蒐采殘缺不全且多假手於不學之俗師向壁虛造謬妄百出故其爲譜也陋而誣欲挽其弊而復於古蓋有其道吾九世祖屹古府君序永樂譜曰每歲冬至會於祠堂凡吉凶細大有關於譜者預書別簡竊謂此法最善宜切寔而奉行之一族之中每歲有生者死者葬者嫁者娶者遷徙它方畢業學校者仕

任何職者冬至日會於祠堂各自報告預擇竺於根本長於記載者一人或二人典其事即時記之於冊其有孝弟節義之行卓犖可傳之事與夫有關一族如修葺宗祠祖墓添置祀產之類尤宜詳載始末分錄二冊一藏於祠堂一藏於主筆之家主筆者平日有所訪聞亦記之於冊族中有著述出版者或其先人傳狀誌銘墓表有印本搨本稿本者均宜送一分藏於祠堂送一分於主筆者主筆者亦記之於冊主筆者平日於族人之著述詩文及有關於族人之著述詩文如有所見亦宜隨時錄副每閱十年將積錄之冊分門編纂成爲譜稿其詩文則編爲家集用謄寫版或聚珍版刷印之藏諸祠堂分頒同族以防

散佚閱三十年則彙歷次所積之稿推族中之有學識能文章者纂輯爲續譜續集如是則文獻足徵成書自易足備一家之故矣

記事之書莫善於賡續莫不善於改竄蔚宗續漢不牽孟堅之書仁甫長編自繼涑水之後志會稽者嘉泰與寶慶並傳志赤城者篋窗與桃谿相續類皆接踵繼軌斷代爲書後世方志好事黠竄至於譜牒尤樂更張新編殺青舊書覆瓿甚可歎也舟瑤此次纂述亦欲率由舊章惟舊牒僅存系圖世傳二類餘皆前佚不得不發凡起例沿流溯源今前事旣舉門類略備後有作者惟當遞續無事紛更其有數典不忘留心家學於書缺者

補之誤者正之別爲補訂數卷均刊書後可耳至易世新編可
題續譜其再後可題三譜或以此次所修爲初編其後修題爲
西橋王氏譜第二編再後題爲第三編家集仿此題爲西橋王
氏續集三集以此類推至於十百惟新編既就舊本湏存流傳
無多宜事重印訂爲叢編足備掌故蓋如此則歷年未久事蹟
易詳其善一也斷代而編成書較易其善二也不沒前入之美
各留一書之真其善三也或曰三十年而一修斷代爲書畧前
詳後則所續者不過系表家傳數門其餘或寥寥數事未能盈
篇或無大變更無事可續門類不備卷帙太簡爲之奈何曰遞
續之書不必門類求備有可續者續之無可續者闕之如林表

民赤城三志其所紀者止紹定大水重築郡城一事不皆依陳

氏舊目也

林志已佚此
見王象祖序

梅應發四明續志其所紀者皆吳潛政績

亦非同羅氏原書也至卷帙簡畧無乖義例如朱長文吳郡圖
經續記凡二十八門而書止三卷有一門數十條者有一門僅
一二條者徵引博而敘述簡號稱名作固不必類皆成篇篇皆
盈卷也古譜之見隋志者如楊氏譜楊氏枝分譜北地傅氏譜
蘇氏譜皆止一卷京兆韋氏譜楊氏血脈譜皆止二卷歐蘇之
譜最爲有名其書亦止一卷而王荆公爲許氏世譜且止一篇
書固不以多爲貴也夫前書已備後無變更者可不必續若前
書所無後以義起不妨窮源竟委別創一門如馬無地理而班

志直溯夏書梁陳無志而隋書兼綜五代梁陳北齊後周隋爲五代此在精通史法深諳譜學明於著書之義例者隨時損益因義取裁可也續修之法攷伯議之詳矣是編告成後每年冬至日族人會集祠堂凡有應報告應紀錄者卽仿照實行冊記之事先以梅友叔鼎任其責後以次擇人分任所有費用由祠產取支其他編纂續修諸法均亦以是議爲準

敬詮家事預議

禮七十曰老而傳余今年六十有二去可傳之時轉瞬間耳余性疏懶欲卽櫛產分與子輩藉以息肩因次子瀛在德未便遽析姑預議分析大要附載譜末余在城家產擬分作四規余二

老養饒共成一規另提田一畝穀二石給與長子登餘三規長子登次子瀛三子侃各得一規黃巖溪家產皆貯爲余公產所有公用及普通酌應之需取給焉二女秀鳳遇人不淑回家終養現雖爲淑德女校教員不常在家而余二老之相依以生者實惟此女是賴蓋三子各有子女爲飢所驅或至出外謀食而鳳女則固長依匕膝下者也余二老儼生與鳳女同居死與鳳女同穴鳳女卒後凡余孫支皆爲服衰麻服題木主皆列名侍奉鳳女所有私產生前概由伊自管余死後所有養饒之產倘仍保存則作爲祀產名曰敬公祀產祀產至多以四五石爲限三子每年挨輪其餘存產及黃巖溪所有家產俱名爲敬公

公產每年出息擇人經管用以添買租穀俾公產可以增加鳳女卒後所有租穀提八十石爲祀產名曰二姑太祀產分作二年挨輪譬如長子輪管余祀產則次子三子分輪鳳姊各半祀產以此遞推各房分每年皆可分潤鳳女餘產除祀產外亦皆存以添買租穀名爲二姑太公產此二項公產管理之法俱照倫公公產管理法辦理其周恤本支人之款亦均一例照辦無得違背惟余所有黃巖溪公產三子中如有願返舊居承受此產者則邀戚友估值由承受人出值歸公添置公產以昭平允而免紛爭至余在城家產細數則俟分析時公同分配余提一規外餘三規由三子拈鬮分承余更欲構屋三楹或五楹爲余

二老與鳳女同居之所卒後則爲余三人小祠并爲子姓輩讀書書塾能否如願尙未敢必也

祀產所遺各分每年旣皆有輪值則各分每年皆須祭掃一次如清明節大分清明日祭掃隔二日二分祭掃再隔二日三分祭掃祭品用熟食九碗均要烹飪合宜與生人之食一樣祭後分食餚餘大分邀男人共食二分三分邀婦女幼小共食亦以次挨輪子孫到墳者每人分給炊飯一斤冬至到祠者亦然敬諡自記

譜跋

宗澄輯家譜成忽復有感因作而言曰余田上洋毛氏自城毛

術頭來遷已信而有徵按毛術頭者因毛氏舊居而得名者也其始於何時蓋不可考然黃巖志分載都圖悉本於清雍正十一年樊令琳編定而北城一圖已有毛術頭之名又毛術頭族叔六謙住居係明代建造其宅中土神背上尙載有明嘉靖二十八年立則因毛氏之居得名殆數百年於茲矣自凡地之以氏族名者其氏族必繁盛而悠久相沿成習而後人乃以其氏名之毛術頭以毛名則吾族當時亦必繁盛至何時始衰已無有知之者大約洪楊亂後分崩離析舊譜以亡遂至凌夷不可復問耳考黃巖志世襲類有毛維城者乍浦外委咸豐拾壹年死於賊有毛化燿者黃標左營把總同治六年八月巡洋緝盜

淹弊有毛文錦者例貢生成豐十一年十一月死於賊皆係毛術頭支派是洪楊亂時吾毛氏武功尙有可言者而乃終至不振毋乃世襲諸人晏安成習不思祖父爲國捐軀當深自刻勵以迪前光而反藉以偷安竟至毫無成就語曰莫爲之後雖盛弗傳吾不能不爲死事之子若孫慨矣舊傳吾族分五派毛術頭而外則分居黃巖溪邵輿沙埠半洋埠頭堂梨坑各處今黃巖溪一派子姓日漸繁衍餘四派俱就衰弱族叔六謙前至沙埠各處訪求舊族問其世系則知其父而忘其祖且有瞠然以父名狗對者其他無論矣嗟乎無祖安有父水源木本之謂何而竟惘也若此耶余聞而心傷之因思子孫之分離散失愚頑

不靈由於無房譜者半由於無教育者亦半而教育爲尤要有教育則讀書明理知自愛其身知自愛其身卽知自愛其宗族無譜亦可以有譜無教育則榛乚狂乚不知有身安問身之所從出蟪蛄朝菌嗒焉待盡復何望焉吾毛氏舊譜雖經亂喪失而亂平以後已更數十寒暑當喪失未久時苟能急於搜求或尙可得卽不得而故老猶存其祖若宗之嫡派亦可訪問知之以爲續修之助奈何舊者竟逸而新者又未續耶余纂修家譜特錄取王氏續修宗譜議以爲後之續修者法而續修有法尤賴續修有人續修人非家有教育不能致因又推論及之嗚呼往者已矣來者可追吾田上洋毛氏既有是譜以爲嚆矢後之

孫子如能以邵畧各處爲戒而教育不敢稍懈宗譜不敢稍忽則有祖父不致與無祖父者等邵畧各處之孫子如亦能以是爲戒而知所自返則無祖父亦可以有祖父否則喪亂之事何代無之任其敗壞而不爲救挽吾恐呼牛應牛呼馬應馬不待外人凡其子孫皆有先之者矣不亦大可懼耶六世孫宗澄